

## DIŽA' GÜEN DAN' BZOJ SAN MARCOS

Juan ben' bzoa beñe' nis gwɔdixjue'ede' diža' güen che Diosen' latje daš  
(Mt. 3:1-12; Lc. 3:1-9, 15-17; Jn. 1:19-28)

**1** <sup>1</sup> Qui goc cate' gwxe xtiža' Jesucristo ben' nac dogualje Xi'in Dios.

<sup>2</sup> Da' Isaías ben' be' xtiža' Diosen' cani' bzoje' da' nga, žan:

Chselä' to beñe' cuialagüe' laogüon' güe'e xtižon',  
cont ba zjanita' beñe' yosozenague' chio' cate' šejo'.

<sup>3</sup> Bena' chne' žižje latje dašen' že':

“Le gonšagüe' yichjlažda'olen' cont gwzenagle che Xanchon' cate'  
yide';

le cuejyichj da' malen' chonle cont yichjlažda'olen' gaquen ca to nez  
da' ba gosonšagüe'.”

<sup>4</sup> Ca' goquen', Juan ben' chzoa beñe' nis bžine' latje dašen' na' gože' beñe'  
ca' besežag na' cheyalä' yesyetinjde' xtola'gaque' na' yesezoe' nis cont

nitlao xtola'gaque'. <sup>5</sup> Zan beñe' za'ac do distritw Judea na' ciuda

Jerusalén bosozenague' che diža' dan' chyixjue'ede'. Na' cate'

gosexoadole' bi da' xinj zjanone', Juanna' bzoje' legaque' nis lo' yegw  
Jordán.

<sup>6</sup> Xaläna' Juanna' goquen de yiša' xa camello na' da' bchej lsine'

goquen de yid, na' gwɔdagüe' biše'zo len šina' beser yiše'. <sup>7</sup> Na'

gwɔdixjue'ede' beñe' xtiža' Diosen', gwne':

—Coža' na' za' za' to beñe' zaca'che' ca neda', na' da' nacchgüe' beñe'

zaca', bi zaca' gona' xmandadoe' lechja' no xele'. <sup>8</sup> Neda' ba bzoa' le'e nis,

perw ben' za' zan' gone' cont soa Spiritw che Diosen' lo' yichjlažda'olen'  
nabian' xbab chele.

### Jesúsen' gwzoe' nis

(Mt. 3:13-17; Lc. 3:21-22)

<sup>9</sup> Ca tiempa' Jesúsen' gwze'e lagüe yež Nazaret da' chi' ga mbane

distritw Galilea, na' Juanna' bzoje' le' nis lo' yegw Jordán. <sup>10</sup> Na' šlac

chechoj Jesúsen' lo' nisen', Jesúsen' ble'ede' byalw yaban' gan' zoa

Diosen', na' Spiritw che Diosen' betjen jasoan len le', na' ca hora'

Spiriton' naquen ca nac ngolbex. <sup>11</sup> Na' gosende' gwne' Dios ben' zoa yaba  
gwne':

—Len' naco' Xi'ina' bene' chacchgüeda', na' chebe

chezaque'laže'chgüeda' chio'.

**Satanásen' goclažen' co'oyelan' Jesúsen' cont gone' da' mal**

(Mt. 4:1-11; Lc. 4:1-13)

<sup>12</sup> Nach Spiritw che Diosen' benen cont la' gwyejte Jesúsen' latje daš.  
<sup>13</sup> Na' gwzoe' latje dašen' choa ža ladjo be znia ca'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. Nach beyoža' jasaclen angl che Diosen' le'.

**Jesúsen' gwzolao chyixjue'ede' xtiža' Diosen' distritw gan' nzi' Galilea**

(Mt. 4:12-17; Lc. 4:14-15)

<sup>14</sup> Beyož gosegüe'e Juanna' ližya, Jesúsen' beze'e beyeje' Galilea gan' jatixjue'ede' diža' güen, gwne' Diosen' nabi'e yichjlaždao' bene' ca' yosozenag che'. <sup>15</sup> Jesúsen' gwne':  
 —Ba bžin ža cate' Diosen' nabi'e yichjlaždao' bene' yosozenagüe' che'.  
 Le yetinje xtoła'len' na' le šejle' diža' güen che Diosen' da' chyixjue'eda'.

**Jesúsen' goxe' tap bene' gwxen bel šja'aclene' le' txen**

(Mt. 4:18-22; Lc. 5:1-11)

<sup>16</sup> Jesúsen' chde' do cho'a nisdao' che Galilean' cate' ble'ede' chope bene' gwxen bel, Simón na' bene' biše' Andrés. Na' zjanite' chosozale' yixjw dan' chesezende' belen' lo' nisa'. <sup>17</sup> Na' gož Jesúsen' legaque':  
 —Le šo'o len neda'. Nacle bene' gwxen bel na' chbejle belen' lo' nisen', perw na'a gona' cont gaxle bene' yesyechoje' lo da' malen'.  
<sup>18</sup> Nach la' bosocua'ante yixjw chen' na' jasa'aclene' le'.  
<sup>19</sup> Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw chegaquen'.  
<sup>20</sup> Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac xagaque lo' barcon' len bene' ca' chesaclen le', nach ja'aque' len Jesúsen'.

**To bene' gwyo'o gwyaze' da' xigüen'**

(Lc. 4:31-37)

<sup>21</sup> Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gwzolagüe' bsd blo'ede'. <sup>22</sup> Bene' ca' že' na' besyebande' can' bsd blo'ede', le can' bzejni'iden' nacbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés. <sup>23</sup> Na' lo' yodaon' zoa to bene' yo'o nyaze' da' xigüen', na' bosye'e gwne':  
<sup>24</sup> —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw bene' gwsela' Dios.  
<sup>25</sup> Nach Jesúsen' gože' da' xigüen':  
 —iŠšago', bechoj lo' yichjlaždao' benga!

<sup>26</sup> Na' da' xigüen' benen cont gwchole' bena', nach chosya'adiachguan bechojen lo' yichjlažda'ogüen'. <sup>27</sup> Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga? iNacbia' nape' yela' chnabia' na' yela' guac, le da' xigüe' ca' chesonen da' že'!

<sup>28</sup> Na' ca' nac dan' ben Jesúsén' bedao'nez gos gwlałje dižan' doxen lagüe yež ca' gan' mbane Galilea.

### **Jesúsén' beyone' taobi'ın che Simón Pedro**

(Mt. 8:14-15; Lc. 4:38-39)

<sup>29</sup> Cate' besyechoje' lo' yodaon', Jesúsén' len Jacobo na' len Juan ja'aque' liž Simón na' Andrés. <sup>30</sup> Na' taobi'ın che Simónna' die' che'ede' xla; na' gose'e Jesúsén':

—Benga die' che'ede'.

<sup>31</sup> Nach jabiga' Jesúsén' na' beıue' taquen' gwlıse'ne'. Na' la' beyactede', nach bsini'e da' gose'ej gosagüe'.

### **Jesúsén' beyone' zan bene' chese'ede'**

(Mt. 8:16-17; Lc. 4:40-41)

<sup>32</sup> Cate' ba gwxa gwbižen' na' ba gwıın, jasesane' lao Jesúsén' zan bene' chese'ede' na' bene' zjajo'o zjanyaze' da' xigüen'. <sup>33</sup> Na' do yež bene' besedop besežague' cho'a yo'o gan' zoa Jesúsén'. <sup>34</sup> Na' Jesúsén' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanezen non' nac le'.

### **Jesúsén' chyixjue'ede' xtiža' Diosen' Galilea**

(Lc. 4:42-44)

<sup>35</sup> Šbał cate' ne' nac choljesúsen' gwyase' na' gwze'e gweje' ga nono nla' na' bol güiže' Diosen'. <sup>36</sup> Simón na' bene' lježe' ca' ja'aque' jasyediljue'ne'. <sup>37</sup> Na' cate' besyeželde'ne' gose'ene':

—Yogo'ze bene' chesyeyiljue' le'.

<sup>38</sup> Perw Jesúsén' gože'ne':

—Le šo'o ga yoble ga nac gala'ze cont lecze šjatixjue'eda' xtiža' Diosen' na', le da'nan' ba gwza'a.

<sup>39</sup> Can' goc, Jesúsén' gwde' doxen gan' mbane Galilea gwıixjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

### **Jesúsén' beyone' to bene' che'ede' lepra**

(Mt. 8:1-4; Lc. 5:12-16)

<sup>40</sup> To bene' che'ede' yižgüe' dan' nzi lepra jabigue' gan' zoa Jesúsén' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

<sup>41</sup> Na' Jesúsen' beži'ilaže'de' le' na' bexue'ne' gwne':

—Chaclaža' yeyacdo'. Beyaque.

<sup>42</sup> Cate' gwne' ca' la' bega'ate yižgüen' na' beyacde'. <sup>43</sup> Nach Jesúsen' besele'ne' liže', bene' mandadw, gože'ne':

<sup>44</sup> —Notno yo'o can' ba beyona' le', con gwyej jana' bxoza' cont le'ede' bach beyacdo', na' bnežjw da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

<sup>45</sup> Perw ben' bi bchejde', yogo'ze bene' gože' can' goca'. Da'nan' Jesúsa' bich goc šeje' con ca nla'ze gate'teze yež, san con gwde' do yixe', na' bia'cze bene' za'ac yogo'ze yež jasene'e le'.

### Jesúsen' beyone' to bene' bi chda šla'a ni'a ne'e

(Mt. 9:1-8; Lc. 5:17-26)

**2** <sup>1</sup> Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'. <sup>2</sup> Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwduxjue'ede' xtiža' Diosen' len legaque'. <sup>3</sup> Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'. <sup>4</sup> Perw bi chac yesežine' gan' zoa Jesúsen' catec chyí. Nach goseque'e tej dan' ncu'a' yichj yo'on na' beseletje' le' na'le to lo cam dao'. <sup>5</sup> Na' cate' Jesúsen' gocbe'ede' can' chesejnilaže'nen', gože' bene' güe'na':

—Xi'ina', ba bezi'xena' xtolon'.

<sup>6</sup> Ba bene' chososed chosolo'e ley dan' bzoj da' Moisésen' zjachi'e na', na' gosone' xbab: <sup>7</sup> “¿Bixchen' chna benga ca? le chon cuine' ca Dios. Nono zoa bene' gac yezi'xene' xtola' benach. Toz Diosen' gac yezi'xenen'.” <sup>8</sup> Perw Jesúsen' chacbe'eczede' can' nac xbab chegaquen', na' gože' legaque':

—¿Bixchen' chza'laže'le ca? <sup>9</sup> Še yapa'ne': “Ba bezi'xena' xtolo'na'”, bi nezele še napa' yela' gwnabia' cont yezi'xena' xtola'ne', san še yapa'ne': “Gwyas, beyoa' xcamon'”, na' nacbia' še napa' yela' guac gac can' gwnian'. <sup>10</sup> Perw neda' naca' ben' gwsela' Dios golja' benach, gwlo'eda' le'e na'a zoa' yežlio nga napa' yela' gwnabia' cont yezi'xena' xtola' benach.

Nach gože' bene' xinja':

<sup>11</sup> —Chapa' le', beyas, beyoa' xcamon' na' beyej ližo'.

<sup>12</sup> La' beyaste bene' xinja' chesena'te bene' ca' nita'na' na' beyoa' xcamen'. Da'nan' yogo' bene' ca' besyebande' na' goso'e yela' choxcen che Diosen', gosene':

—Bina' le'echo yela' guac dan' nac ca'.

**Jesúsen' goxe' Leví cont gwejlene'ne'**

(Mt. 9:9-13; Lc. 5:27-32)

<sup>13</sup> Da' yoble gwej Jesúsen' cho'a nisdao' na' bene' zan besedobe' gan' zeje' na' bsd blo'ede' legaque' xtiža' Diosen'. <sup>14</sup> Na' Jesúsen' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwejlene'ne'.

<sup>15</sup> Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan bene' güeçhixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'. <sup>16</sup> Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' besele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxeçhen' ben' chsed chlo'e le'e che'ej chagwlene' txen bene' güeçhixjw na' yebał bene' güen da' xinj ca'?

<sup>17</sup> Cate' Jesúsen' bende' can' gosene' na' gože' legaque':

—Bene' bi chesacšene bi cheseyažjde' bene' güen rmed. Bene' chesacšende', legaquen' cheseyažjde' bene' güen rmed. Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaquen' zjazaca'lebe' ca' bene' cheseyažje bene' güen rmed.

**Goseñabde' Jesúsen' bixchen' bene' zjanaque' le' txen bi chesone' gwbas**

(Mt. 9:14-17; Lc. 5:33-39)

<sup>18</sup> To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jaseñabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

<sup>19</sup> Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan', bi gac yesone' gwbas. <sup>20</sup> Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

<sup>21</sup> 'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache' golen', na' gan' žon'na' gacchen da' xen. <sup>22</sup> Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

**Bene' ca' zjanaque' Jesúsen' txen chesalje' dao ža che Dios**

(Mt. 12:1-8; Lc. 6:1-5)

<sup>23</sup> To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao che trigon' šlac gosedie' gan' nyaženna'. <sup>24</sup> Nach bene' fariseon' gose'e le':

—Gwnašc' ÷bixchen' cheson bene' ca' zjanaque' le' txen žin da' bi cheyała' yesone' ža che Dios?

<sup>25</sup> Na' Jesúsen' gože' legaque':

—÷Bina' gwlable can' ben da' rey David to ža cate' le' na' bene' lježe' ca' gosedone'? <sup>26</sup> Gwyo'o Davin' ga nac liž Dios cate' da' Abiatar goque' bꝁoz blao, na' gwdagüe' yetextil da' nac che Dios da' bi chac gagw bene' bi nac bꝁoz, na' lecze bnežjue' che bene' zja'ac len le'.

<sup>27</sup> Lecze gož Jesúsen' legaque':

—Diosen' gwleje' to ža cate' bi yeson benachen' žin cont gaclenen benach, gague gwleje' benachen' cont yesonxene' ža chen'. <sup>28</sup> Da'nan' naquen lo na' nia' bi da' nac güen goncho lente cate' nac ža che Dios, neda' naca' ben' gwsela' Diosen' golja' benach.

**Jesúsen' beyone' to bene' nꝁo'on' šla'a taque'**

(Mt. 12:9-14; Lc. 6:6-11)

**3** <sup>1</sup> Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nꝁo'on' šla'a taque'. <sup>2</sup> Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. <sup>3</sup> Nach Jesúsen' gože' ben' nꝁo'on' taquen':

—Gwzoža' na' gwzecha nga.

<sup>4</sup> Nach gwnabde' bene' ca' yezica'chle:

—÷Bi da' cheyała' goncho ža che Dios? ÷Goncho da' güen, še goncho da' mal? ÷Cheyała' yoslacho bene', še cheyała' gotchone'?

Perw na' legaque' gosenite' šižize. <sup>5</sup> Nach Jesúsen' gwne'e legaque', bže'e can' gosone' xbab, na' lecze gocyaše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo. <sup>6</sup> Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

**Zan bene' nita' cho'a nisdaon'**

<sup>7</sup> Nach Jesúsen' gwyeje' cho'a nisdaon' len bene' ca' zjanaque' le' txen, na' zan bene' Galilea ja'ac len le'. <sup>8</sup> Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedesene'e le' cate' gosenezde' yela' guac da' chonen'.

<sup>9</sup> Da'nán' Jesúsén' gože' bene' ca' zjanaque' le' txen yeseyiljue' to barcw dao' gan' cuie' cont bi yosoči bene' ca' zjanžaga' le', <sup>10</sup> le' bene' zan ba beyone', na' bene' ca' ne' chese'ede' chosožiga' lježe' nac gac yesoxe'ne'.  
<sup>11</sup> Na' bene' ca' zjajo'o zjanyaz da' xigüen' cate' chesele'ede' Jesúsén' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

<sup>12</sup> Perw Jesúsén' gwdile' legaquen na' bene' mandadw bi yesenan no nac le'.

### **Jesúsén' gwchie' bene' šižinw ca' gosaque' txen len le'**

(Mt. 10:1-4; Lc. 6:12-16)

<sup>13</sup> Beyoža' Jesúsén' gwloe' to lo ya'a na' goxe' bal' bene' goclaže' šja'aclene' le', nach gosa'aque' ja'aque' gan' zoen'. <sup>14</sup> Nach gwleje' šižinw bene' yesenita' len le', cont sele' legaque' šjasedixjue'ede' xtižen'. <sup>15</sup> Na' bnežjue' legaque' yela' guac cont yesyeyone' bene' güe' na' yela' gwnabia' cont yesyebeje' da' xigüe' da' yo'o nyaz bene'. <sup>16</sup> Šižinw bene' quin' gosac: Simón ben' lecze gože'ne' Pedro; <sup>17</sup> Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen; <sup>18</sup> nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista, <sup>19</sup> na' Judas Iscariote ben' gwdechle bdie' Jesúsén' lo na' bene' ca' cheseque'ede' le'.

### **Gosene' Jesúsén' bebeje' da' xigüe' len yela' guac che Beelzebú**

(Mt. 12:22-32; Lc. 11:14-23; 12:10)

Beyoža' Jesúsén' len bene' ca' zjanaque' le' txen goso'e lo' yo'o gan' zoe' ca' hora', <sup>20</sup> na' da' yoble besežagchgua bene', neca' goc yes'e'ej yesagw Jesúsén' len bene' ca' zjanaque' le' txen. <sup>21</sup> Na' cate' goseneze biše' ljež Jesúsén', ja'aque' cont yesyeche'ene', le' gosene' chactonte'.

<sup>22</sup> Nach bene' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsén' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

<sup>23</sup> Nach Jesúsén' goxe' bene' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'? <sup>24</sup> Še to gobiern choje' chop šon cuenle na' yeyoža' yesedile legacze', gobiernna' bi sibi'e. <sup>25</sup> Na' še bene' že' toz yo'o yesechoje' chople na' yesedile legacze', gague sša yesenite' txen. <sup>26</sup> Na' še Satanásen' len da' xigüe' chen yesechojen chople na' yesedilen, lecze bi sibian', san na' yeyož yedon.

<sup>27</sup> 'Nono gac šo'e lo' yo'o che to bene' gual na' que'e bi da' de che' še cbi zgua'tec gwcheje' bene' gual na', lete gone' ca' nach gac que'e bi da' de che'.

<sup>28</sup> 'Da' li žia' le'e, yogo' da' xinj da' chon benach na' yogo' diža' bya' da' yesene', Diosen' yezi'xene' chen še yesyetinjde'. <sup>29</sup> Perw note'teze bene' ne' yela' ya' che Spiritw che Dios, gwbat yezi'xen Diosen' che', san de doła' che' toli tocane.

<sup>30</sup> Gwne' ca' dan' gosene' che' yo'o nyaze' da' xigüe'.

### **Xna' Jesúsén' na' bene' biše' gosaxe'ne'**

(Mt. 12:46-50; Lc. 8:19-21)

<sup>31</sup> Na' bžin xna' Jesúsén' len bene' biše', na' gosenite' chyo'ole gosaxe' le'. <sup>32</sup> Na' bene' ca' zjanita' cuit Jesúsén' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

<sup>33</sup> Nach Jesúsén' gože' legaque':

—¿Nezele non' nac xna'a na' no zjanac biše' lježa'?

<sup>34</sup> Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'. <sup>35</sup> Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

### **Jempl che bene' goz trigo**

(Mt. 13:1-9; Lc. 8:4-8)

**4** <sup>1</sup> Yeto ža yoble gwzolao Jesúsén' chsed chlo'ede' cho'a nesdaon', na' besežagchgua bene' zan juisyw gan' chi'ena'. Na' da' besežagchgua bene' zan, benten byen gwo'o Jesúsén' to lo' barcw dao' da' chda' lo nesdaon' cho'a yo bižen' na' gwchi'e lo'enna', na' yogo' bene' ca' gosenite' cho'a nesdaon' ga nac yo biž. <sup>2</sup> Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

<sup>3</sup> —Le gwzenag da' nga: To bene' güen žin jeze' trigw. <sup>4</sup> Na' šlac zeje' chose' trigon', late' bin che trigw dan' chazen' jasechazen chanez nach be ca' žia xil be chaš le'e yaba gosagwban'. <sup>5</sup> Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw. <sup>6</sup> Perw cate' bla' gwbiža' na' bzeyen len na' gwbižen, le gague yo'otec loenna' sitjon'. <sup>7</sup> Yelaten' jasechazen ga nac lo yag yeše', na' yag yešen' gosecha'on na' bosololen' len, na' bibi gosebian. <sup>8</sup> Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebian, balen gosebian do šichoa güeje to ton, balen gayon, na' yebalen do to gayoa.

<sup>9</sup> Na' gože' legaque':

—Le'e žia nagle da' chene, le gwzenag xtiža'na'.



**Bichen' bzejni'ide' bene' len jempl***(Mt. 13:10-17; Lc. 8:9-10)*

<sup>10</sup> Gwdena' cate' ba besyeya'ac bene' zan ca', bene' ca' zjanita' gala'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en. <sup>11</sup> Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. <sup>12</sup> Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden', na' neca yesyetinjde', neca yezi'xen Diosen' xtolen'.

**Jesúsen' bzejni'ide' bi zejen jempl che ben' ben goza'***(Mt. 13:18-23; Lc. 8:11-15)*

<sup>13</sup> Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? <sup>14</sup> Ben' ben goza' naque' ca ben' choe' xtiža' Diosa'. <sup>15</sup> Na' bal bene' zjanaque' ca bin dan' beselažo' chanez, le chosozenague' cate' chas chlalje xtiža' Diosen', na' ca cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. <sup>16</sup> Yebal bene' zjanaque' ca bin dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen', <sup>17</sup> perw šložga chesezibi'e, na' cate' chesac bi da' mal chegaque' o bichle chesone bene' legaque' neche da' chosozenague' xtiža' Diozen', la' chesebejyichjten'. <sup>18</sup> Na' yebale' zjanaque' ca bin dan' besego'onen ga nac lo yag yeše'. Chosozenague' xtiža' Diosen', <sup>19</sup> na' šlac zjambane' chesyelal chesyėjejde', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'nán' bi chesejnilaže' le' ca cheyala'. <sup>20</sup> Perw na' nita' bal bene' chosozenague' xtiža' Diosa' na' chesejnilaže' le' do yichj do laže', bene' qui zjazaca'lebde' ca bin dan' beselažo' lo yo šagüe'. Bale' zjanaque' ca bin dan' gosebían šichoa güeje to ton, na' yebale' ca da' ca' bexoen' gayon, o ca no da' ca' bexoen' to gayoa güeje to ton.

**Jempl che yi' dan' chguala'cho***(Lc. 8:16-18)*

<sup>21</sup> Lecze gože' legaque':

—Cate' chguala'cho to yi' ¿gwdosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwsenin'.

<sup>22</sup> Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'. <sup>23</sup> Le'e žia nagle da' chene, le gwzenag xtižan'.

<sup>24</sup> Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'. <sup>25</sup> Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

### Jempl che biñ dan' chlan' na' chcha'on

<sup>26</sup> Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze biñ lo yo. <sup>27</sup> Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nezde' naquen' chac. <sup>28</sup> Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyala' cuian. <sup>29</sup> Na' cate' ba gol dan' chbianna' na' chja'aque' chjasyexi'en, le ba bžin cho'a gwlap.

### Jempl che biñ che xomdas

(Mr. 13:31-32; Lc. 13:18-19)

<sup>30</sup> Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaque'. <sup>31</sup> Naquen ca to biñ che xomdas da' chyaž lo yo. Len chnabia' nac da' dao' len biñ ca' chazcho lo yežlion'. <sup>32</sup> Perw cate' bach nyažen, chcha'on na' chaquen da' xench lao yixe' cuan ca', na' da' xenchgua chac xol che xozenna', na' lente byiñ dao' ca' chesyezi'laže'ba lo xozenna'.

### Jesúsen' bgone' žin jempl

(Mt. 13:34-35)

<sup>33</sup> Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che biñ ca', con ga zelao goc gosejni'ide'. <sup>34</sup> Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

### Jesúsen' bebecžie' be' bdono' len nisdao'

(Mt. 8:23-27; Lc. 8:22-25)

<sup>35</sup> Leze lo žana' cate' gwxin, Jesúsen' gože' bene' ca' zjanaque' le' txen: —Le šo'o laga'cho yešla'a nisdaon'.

<sup>36</sup> Nach bosyocua'ane' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto chop barcw dao'. <sup>37</sup> Na' gwzolao gwyečhjchgua to be' bdono' na' nisdaon' leze chas chatan', na' gwzolao cheyož nis lo' barcon'. <sup>38</sup> Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—iMaestro! ¿Bibi de chza'lažon' še ba gwdebe nisdaon' chio'?

<sup>39</sup> Nach gwyas Jesúsen' na' gwdile' be' bdonon' na' gože' nesdaon':

—iŠižize! iŠižize!

Na' bebe'ži be' bdonon' na' beyata'ži nesdaon'. <sup>40</sup> Nach Jesúsen' gože' bene' ca' zjanaque' le' txen:

—¿Bixchen' chžebtecle? ¿Nacxechen' bi chejle'le chia'?

<sup>41</sup> Legaque' besežebchgüe' na' gose' lježe':

—¿Noxe benga? lente be' bdonon' na' len nesdaon' chosozenaguen che da' že'.

### **Bene' Gadara yo'o nyaze' da' xigüe'**

(Mt. 8:28-34; Lc. 8:26-39)

**5** <sup>1</sup> Besežine' šla'a nesdaon' gan' mbane Gadara, <sup>2</sup> na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'. <sup>3</sup> Bena' ba zoacze' capsantw na'le na' nono chzoe goxe' le', ne len gden ca gosezoede' le'. <sup>4</sup> Da' zan ni'a bosocheje' ni'a ne'e gden, perw bia'cze gwchoguen', con bzoj btinen', na' nono gwzoe le'. <sup>5</sup> Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. <sup>6</sup> Na' cate' ble'ede' Jesúsen' zito' gwyejsese' jaoa xibe' lagüen', <sup>7</sup> na' da' xigüen' benen cont bosya'adie' gože' le':

—¿Bixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neche Dios chneyoeda' le' bi gwsaco' neda'.

<sup>8</sup> Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

<sup>9</sup> Na' gwñabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

<sup>10</sup> Na' goseneyoen Jesús'a bi yeselen' zito' cate' yesyežašen' yichjlaždao' ben'. <sup>11</sup> Na' gala'ze lo ya'ana' chesaš zan coš chesagwba'. <sup>12</sup> Nach da' xigüen' goseneyoen le':

—Gwsela' neto' gan' nita' coš ca' na' beñ latje šjajo'oto' lo' yichjlažda'oban'.

<sup>13</sup> Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

<sup>14</sup> Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc.

<sup>15</sup> Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'. <sup>16</sup> Na' bene' ca' besele'ede' can' goquen' goso'e diža'

che dan' goc len ben' gwyo'o gwyaz da' xigüen', lez ca' dan' goc len coš ca'. <sup>17</sup> Nach gosezolagüe' gosata'yoede' Jesús'en yeze'e lažgaquen'.

<sup>18</sup> Na' cate' beyo'o Jesús'en lo' barcon' ben' ba gwyo'o gwyaz da' xigüen' gota'yoede' Jesús'en šejlene' le'. <sup>19</sup> Perw Jesús'en bi be'e latje, san gože' le':

—Beyej ližo' na' jayež bene' lo' yo'o chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

<sup>20</sup> Na' beza' ben' na' gwzolagüe' cho'e diža' yež ca' gan' mbane distritw Decápolis yogo' can' ben Jesús'en len le', na' yogo' bene' gosene xtižen' besyebande'.

### Bi' no'ol che Jairo, na' no'ol ben' gwdane' xa Jesús'en

(Mt. 9:18-26; Lc. 8:40-56)

<sup>21</sup> Cate' bežin Jesús'en cho'a nisdaon' zeze'e lo' barcw daon' dan' zeza' šla'a nisdaon', bene' zan ja'aque' gan' bežinen', na' Jesús'en bega'ane' cho'a nisdao' na'ze. <sup>22</sup> Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesús'en bzoa xibe' lagüen' <sup>23</sup> na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

<sup>24</sup> Nach Jesús'en gwyejlene' le'. Na' bene' zan ja'acch, na' bosochichgüe' le'. <sup>25</sup> Ladjo bene' ca' len to no'ol che'ede', ba goc šiziñw iz chzoe' gwbao'.

<sup>26</sup> Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyała'len.

<sup>27</sup> Cate' bende' cheso'e xtiža' Jesús'en, no'olna' gwdie' ladjo bene' ca' na' bžine' cože'le Jesús'en na' gwdane' xen'. <sup>28</sup> Le bene' xbab, gwne': "Con še ba gwdana' xen' nach yeyactecza'." <sup>29</sup> Na' da' li cate' gwdane' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' chen'.

<sup>30</sup> Na' Jesús'en la' gocbe'etede' to bene' ba beyacde' len yela' guac chen', nach gwyechje' gwne'e bene' ca' nita' cože'le, na' gwnabde' legaque':

—¿Non' gwdan xan'?

<sup>31</sup> Nach bene' ca' zjanaque' Jesús'en txen gose'ene':

—Ba ble'eczedo' ca chosochie' le', ¿bixchen' chnabo' non' gwdan xaon'?

<sup>32</sup> Perw Jesús'en chne'e nile na'le cont le'ede' non' gwdan xen'. <sup>33</sup> Nach no'olen' nezde' can' ba goc che' na' do chaž chžebe' gwyeye' jazoa xibe' lagüen' na' gože'ne' yogo' da' li. <sup>34</sup> Na' Jesús'en gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

<sup>35</sup> Ne' choe'te Jesús'en dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

<sup>36</sup> Perw Jesúsen' bi bene' cuent dan' chesena bene' ca', na' gože' xan yodaon':

—Bitw žebo', con gwyejle' chia'.

<sup>37</sup> Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'. <sup>38</sup> Na' cate' besežine' liž xan yodaon', ble'ede' ba chi' žaš chesosye'e chesebeže'.

<sup>39</sup> Nach gwyo'e na' gože' legaque':

—¿Bixchen' mbecle žaš chbežle? Bi no'ol daon' biña' gatbe', san chtasben'.

<sup>40</sup> Perw bosoxiže' gosonle' che'. Nach Jesúsen' bešaše' yogo'lóle', na' gwche'e xaxna'be' na' bene' ca' zja'aclen le' na'ze na' goso'e len le' gan' de bi' no'ol daon'. <sup>41</sup> Na' bexue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

<sup>42</sup> Nach bi' no'ol daon' la' beyastebe' na' goc beza'be', le šižinw izegueben'. Na' bene' ca' besele'e leca besyežejde' can' goca'. <sup>43</sup> Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

### Jesúsen' bežine' distritw gan' chi' yež Nazaret

(Mt. 13:53-58; Lc. 4:16-30)

**6** <sup>1</sup> Na' beza' Jesúsen' na' bežine' laže', na' bene' ca' zjanaque' le' txen ja'aclene' le'. <sup>2</sup> Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' bene' zan bene' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nezde'? na' ¿nacxečen' chac chone' yela' guac ca'? <sup>3</sup> Benga chonšagüe' yag na' naque' xi'in María. Nombia'chwne' na' bene' biše' Jacobo, José, Judas na' Simón, na' lecze bene' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e che'. <sup>4</sup> Nach Jesúsen' gože' legaque':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

<sup>5</sup> Na' ne to yela' guac ca' goc gone' na', lete gwxxoa taquen' yichj to chop bene' güe' na' beyone' legaque'. <sup>6</sup> Na' bebande' dan' bi gosejle' bene' che'. Na' gwdechle gwda Jesúsen' bsd blo'ede' to to yež dao' ca' nita' gala'ze.

### Jesúsen' gwsele' bene' ca' zjanaque' le' txen

jasedixjue'ede' xtiža' Diosen'

(Mt. 10:5-15; Lc. 9:1-6)

<sup>7</sup> Na' goxe' bene' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' bene'. <sup>8</sup> Na' cate' za' yesa'aque' gože' legaque' bibi yesoxe' chanez, ne

bzod, ne yetextil, ne mechw, con yesoxe' to xis da' yosochiše'. <sup>9</sup> Na' yosoleje' yel perw bi yesoe' yeto xcamise'. <sup>10</sup> Na' lecze gože' legaque':

—Cate' žinle to liž bene', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'. <sup>11</sup> Na' še zoa ga bi yosolebe' le'e neca yosozenague' chele, cate' yeza'le na' le cuibe ni'alēn' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw bene' ca' bi yosolebe' le'e yesacche' castigw clel ca bene' Sodoma na' bene' Gomorra.

<sup>12</sup> Nach gosa'aque', na' goseyixjue'ede' cheyala' yesyētinjē xtola' benachen'. <sup>13</sup> Leze besyebeje' da' xigüe' da' yo'o nyaz bene', na' zan bene' güe' goseyebe'ne' set na' besyeyacde'.

### Gosote' Juan ben' bzoe' bene' nis

(Mt. 14:1-12; Lc. 9:7-9)

<sup>14</sup> Na' ca nac rey Herodes, gwnezde' can' chesone', le yogo'ze bene' gosende' can' ben Jesúsēn'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'nān' chaque' chone' yela' guac.

<sup>15</sup> Yebale bene' gosene':

—Naque' ben' be' xtiža' Diosen' cani', ben' le Elías.

Na' yebale' gosene':

—Naque' con to bene' choe' xtiža' Dios ca bene' ca' gosoe' xtiža' Diosen' cani'te.

<sup>16</sup> Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' na'a ba bebane' ladjo bene' guaten'.

<sup>17-18</sup> Le Herodesen' beque'e Herodías na' gwzoalene' le' goque' xo'ole' la'czla' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyala' soalen no'ol che bene' bišon'.

Da'nān' Herodesen' gwchogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

<sup>19</sup> Can' goc Herodíasna' bgue'ede' Juanna' na' goclaže' gote'ne', perw bi goc. <sup>20</sup> Le Herodesen' gwnezde' Juanna' naque' to bene' chon da' zej to liča na' to bene' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwyejni'iteque Herodesen' dan' bšalj Juanna', con bebede' bzenague' che'. <sup>21</sup> Perw Herodíasen' beyiljwlaže' nac bene' cate' ben Herodesen' lni gola' ža le', bsinie' xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'. <sup>22</sup> Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan chio' na' gonan'.

<sup>23</sup> Na' lecze gože'be':  
—Diosen' naque' testigw chia goṇa' le' con da' nabdo'nda', la' gašjo  
yež ca' gan' mbanda' chnabi'a.

<sup>24</sup> Na' bechojbe' na' gožbe' xṇa'ben':  
—¿Bi nabda'ne'?

Na' le' gože'be':  
—Gwṇab yichj Juan ben' chzoe' bene' nis.  
<sup>25</sup> Na' la' beyo'otebe' gan' chi' reyna' na' gožbe'ne':  
—Che'nda' netecṇa'a gono' neda' to lo' platw yichj Juan ben' chzoa  
bene' nis.

<sup>26</sup> Na' ne late'ze bi gwyazlaže' reyna' gone' can' gož no'ol güegon' le',  
perw bachle gwne' lao bene' ca' jasa'ac ṇin' Diosen' naque' testigw che  
gwnežjue'be' bite'teze nabebe' le', da'nan' bi bžone' gac dan' gwṇabebe'  
le'. <sup>27</sup> Nach la' gwseṇa'te reyna' to soldadw na' gože'ne' šjaxi'e yichj  
Juanna'. <sup>28</sup> Na' gwyej soldadon' lo' yo'o ližyan' na' jachogue' yen Juanna',  
na' bžie' yichje' to lo' platw jasanen' bnežjuen' bi' no'ola', na' bi' nga  
bnežjwben' xṇa'be'.

<sup>29</sup> Cate' goseṇeze bene' ca' zjanaque' txen len Juanna', jasexi'e cuerp  
chen' cont bosocuaše'ne'.

**Jesúsen' bguagüe' gayo' mil bene'**  
(Mt. 14:13-21; Lc. 9:10-17; Jn. 6:1-14)

<sup>30</sup> Beyoža' postlw ca' besyežague' len Jesúsen' na' gose'ene' bica' da' ba  
gosone' na' da' ba bosolo'ede'. <sup>31</sup> Na' Jesúsen' gože'ne':

—Le da, le šo'o ga nac lchojiže' yezi'laže'cho late'.  
Gwne' ca' le chep chetj chac bene', neca chac latje yesagüe'. <sup>32</sup> Nach  
Jesúsen' len postlw che' ca' gosa'aque' ja'aque' legacze' to lo' barcw,  
ja'aque' ga nac lchojiže'. <sup>33</sup> Perw zan bene' besele'ede' gosa'aque' na'  
besyeyombi'e Jesúsen', na' zan yež bene' ca' bosoxonjsese' na' byobch  
besežine' ca' Jesúsen'. <sup>34</sup> Na' cate' Jesúsen' bchoje' lo' barcon' ble'ede' ba  
besežag bene' zan na' beyaše' beži'ilaže'de' legaque', le nite' ca' nita' no  
xila' be nono de gwyoeba'. Nach gwzolaogüe' bsed blo'ede' legaque'.

<sup>35</sup> Cate' ba zoa xin, bene' ca' zjanaque' le' txen gose'ene':  
—Ba zoa xin, na' latj gan' zoacho nga naquen latj daš. <sup>36</sup> Na' besela'  
bene' quinga cont šja'aque' ga že' bene' do ranšw na' do yež dao' ca' dan'  
nyechj mbi'i šjasexi'e da' yesagüe', le bibi de yesagüe'.

<sup>37</sup> Na' Jesúsen' gože'ne':  
—Le'e le güe'e da' yesagüe'.  
Na' legaque' gose'ene':  
—Bi de laxjwto' che chop gayoa ža žin cont šjaxi'to' da' güe'to'  
legaque' yesagüe'.

<sup>38</sup> Jesúsen' gože'ne':  
—¿Gaca' yetextilen' de chele? Le šja'ac le šjana'.

Cate' gosenezde' na' gose'ene':

—De gayo' yetextil na' yečhop beł ya'a.

<sup>39</sup> Nach gože' bene' ca' yesebi'e to xonj güeje' lo yixyen'. <sup>40</sup> Na' gosebe' to gayoa güeje' na' yebale' šiyon güeje'. <sup>41</sup> Nach Jesúsen' gwxi'e yetextil ca' gayo' na' beł ya'an čhope, na' gwne'e le'e yaba bi'e yela' choxcen che Dios na' bzojje' yetextilen' bi'en bene' ca' zjanaque' le' txen cont goseyisen' len bene' ca'. Leze gwdis'e beł ya'a ca' čhop lao yogo'lol bene' ca'. <sup>42</sup> Na' yogüe' gosagüen' na' goseljde'. <sup>43</sup> Beyoža' bososše'e yešiz̄inw žome yetextil bixjw na' len late' güeje beł da' bega'an. <sup>44</sup> Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

### Jesúsen' gwze'e lo nis

(Mt. 14:22-27; Jn. 6:16-21)

<sup>45</sup> Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisdaon' na' yesežine' Betsaida, šlac le' za' chesele' bene' ca' žena' ližgaque'. <sup>46</sup> Na' cate' beyož bzede' bene' ca' diža', gwyeje' lo ya'an bol güiže' Dios. <sup>47</sup> Na' ca' nac barcon', cate' goc čhol ba zejen gachol nisdaon', na' toze Jesúsen' ne' zie' ga' nac yo biž. <sup>48</sup> Na' ble'ede' bi chac yosyose'en binlo, le' ben' chečhjen clele na' bi choen' latje sa' barcon'. Na' šbal beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' <sup>49</sup> cate' besele'ede' le' chze'e lo nisen'. Na' gosacde' še da' chda chelen'. Na' bososye'e. <sup>50</sup> Le yogüe' besele'ede'ne' na' besežebe'. Perw le' la' bol güižte' legaque', gože'ne':

—Le gončach laže'le; nedan', bitw žeble.

<sup>51</sup> Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde', <sup>52</sup> le' bi gosejni'ide' dan' bene' yela' guac len yetextil ca', na' bina' yesejnilaže' le'.

### Jesúsen' beyone' bene' güe' ca' že' Genesaret

(Mt. 14:34-36)

<sup>53</sup> Na' goselague' nisdaon' na' besežine' yežlio gan' nzi' Genesaret, na' bosočeje' barcon' cho'a nisdaon'. <sup>54</sup> Na' cate' beyož besyechoje' lo' barcon' bene' ca' la' besyeyombia'te' Jesúsen'. <sup>55</sup> Na' ja'acsese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjanezde' zoa Jesúsen'. <sup>56</sup> Na' gate'teze gwyej Jesúsen', do yixe', do yež, con goseyixjue' bene' güe' ca' do chanez na' goseneyoede' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.



**Dan' chchoj lo' laždao' beṇaḇchen' chonen cont laždagüen' bi naquen  
xilaže' len Diosen'**

(Mt. 15:1-20)

**7** <sup>1</sup> Nach beṇe' fariseo ca' na' len beṇe' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsén'.  
<sup>2</sup> Na' besele'ede' baḷ beṇe' ca' zjanaque' Jesúsén' txen con gosagüe' neca bosyone'e zan ni'a can' chesacde' cheyaḷa' yesone', na' da'nán' gosezi'diže' legaque'.  
<sup>3</sup> (Le beṇe' fariseo ca' na' yogo' beṇe' Israel gualaž cheto' ca' chesonxene' costumbr ca' da' bosyocua'anlen da' xoxxta'oto' ca' neto' bi yesagüe' še biṇa' yosyone'e zan ni'a.  
<sup>4</sup> Na' cate' yesyežine' lagüe ya'a, bi yesagüe' še biṇa' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.)  
<sup>5</sup> Nach beṇe' fariseo ca' na' beṇe' ca' bososed bosolo'ede' dan' bzoj da' Moisésén' gosenabde' le':

—¿Bixchen' bi cheson beṇe' ca' zjanaque' le' txen can' goson beṇe' gol ca'? san con chesagüe' sin cbi chosyone'e zan ni'a.

<sup>6</sup> Jesúsén' gože' legaque':

—Chonle cayanen' bzoj da' Isaíasén' che le'e nacle beṇe' gwxiye' gan' bzoje', žan':

Beṇe' qui chesonxene' neda' len diža' cho'a,  
perw bi chesonxene' neda' len lažda'ogaque'.

<sup>7</sup> Bibi zejen dan' chesonxene' neda',

le dan' chososed chosolo'eden' naquen da' chnalaže' beṇaḇche.

<sup>8</sup> Bi chonle ca chnalaže' Dios, san na'ole can' ža beṇaḇchen' cheyaḷa' gonle, chyible no yeso' xguague, no xiga' ga che'eje' nis, na' da' zanch da' chonle.

<sup>9</sup> Qui gožch Jesúsén' legaque':

—Chbejyichjle da' non Diosen' mandadw gonle cont na'ole costumbr che beṇaḇch. <sup>10</sup> Da' Moisésén' gwne': “Le gap bala'an xaxna'le”, na' “Note'teze' še chžia chnite' xaxne'e, cheyaḷa' gate.” <sup>11</sup> Perw le'e žale to beṇe' guac ye'e xaxne'e: “Bibi de gona' gaclena' le'e, le yogo' da' de chia' naquen Corbán” (zeje diža', ba bnežjuen' lo na' Dios). <sup>12</sup> Na' žale cate' to beṇe' že' ba naquen lo na' Diosen' nach bich cheyaḷa' gaclen xaxne'e.

<sup>13</sup> Dan' žale ca' chzoale ca'ale dan' ža Diosen' na' con chonxenle costumbr gole che da' xoxxta'ole ca'. Na' da' zanch dan' nac ca' chonle.

<sup>14</sup> Da' yoble gox Jesúsén' beṇe' ca', na' gože' legaque':

—Yogo'le le gwzenag chia', na' le šejni'i. <sup>15</sup> Bite'teze' da' ye'ej gagw beṇaḇchen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'. <sup>16</sup> Le'e žia nagle da' chene, le gwzenag xtiža'na'.

<sup>17</sup> Cate' bsan Jesúsen' bich bšaljlene' bene' ca' na' beyo'e lo' yo'o, nach bene' ca' zjanaque' le' txen gosenabde' le' bi zejen dan' gože' legaque'.

<sup>18</sup> Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw benachen' chonen cont lažda'ogüe' bi naquen xilaže' len Diosen'? <sup>19</sup> Le da' che'ej chagw benachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'. <sup>20</sup> Na' lecze gwne':

—Xbab da' yo'o lo' yichjlaždao' benachen', lenna' chonen cont lažda'ogaque' bi zjanaquen xilaže' len Diosen'. <sup>21</sup> Le lo' yichjlaždao' benachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o bene' byo bi nac bene' chegaque', gwzoa xtogaque', yesote' bene', <sup>22</sup> yesone' gwban, yesezelaže' gata' chegaque' da' de che bene' yoble, yesone' da' mal, yeseziye'e bene', yesone' bichle da' nac da' yela' zto', yesacxi'ede' bene', yeseneye'e che bene', yesaque' bene' ya'laže', yesone' xbab da' bi zaca'. <sup>23</sup> Yogo' da' mal qui chesechojen lo' laždao' benach na' chonen cont bi nac lažda'ogaque' xilaže' len Diosen'.

### To no'ol zito' gwejnilaže' Jesúsen'

(Mt. 15:21-28)

<sup>24</sup> Na' beza' Jesúsen' na' gweyje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono neze, perw bi goc gone' cont bi gosenezde'. <sup>25</sup> Cate la' gwnezete xna' to bi' no'ole bi' yo'o nyazbe' da' xigüen', na' gweyje' na' bzoa xibe' xni'a Jesúsen'. <sup>26</sup> No'olen' goque' bene' zito', no'ole Sirofenicia. Gweyje' gwñabde' Jesúsen' yebeje' da' xigüe' yo'o nyaz bi' no'ol chen'. <sup>27</sup> Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

<sup>28</sup> Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo' yo.

<sup>29</sup> Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

<sup>30</sup> Cate' bežin ližen' ble'ede' de bi' no'ol daon' to lo' cam, na' ba bechoj da' xigüen' yo'o nyazbe'.

### Jesúsen' beyone' to bene' cuež, bene' lecze bi goc nie'

<sup>31</sup> Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. <sup>32</sup> Na' jasesane' to bene' byo bene' cuež na' bi goc nie', na' gosenabe' xoa na' Jesúsen' yichje'. <sup>33</sup> Nach Jesúsen' gwche'ene' late' lchojiže' ga nono bene'

nita', na' bde xbene' lo' nague' na' bži'en xene' na' gwdane' ložen'. <sup>34</sup> Nach gwne'e le'e yaba, bebande', na' gwne':

—iEfata! —zeje diža': iByaljo!

<sup>35</sup> Nach nag bena' besyeyaljon na' goc bende', na' lecze beyac ložen' na' goc gwne' binlo. <sup>36</sup> Na' Jesúsen' gože' bene' ca' nono yese'e ca', perw la'czla' gože' legaque' ca', nachle goso'e diža' can' goca'. <sup>37</sup> Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

### Jesúsen' cho'e da' chagw tap mil bene'

(Mt. 15:32-39)

**8** <sup>1</sup> Ca tiempa' besežagchgua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

<sup>2</sup> —Cheyaše'da' bene' qui, le ba goc šone ža zjanite' nga len neda' na' bibi de yesagüe'. <sup>3</sup> Še yesela'ne' ližgaque' na' bina' yesagüe', chanez yesego'one' yesechold'e', le bale' za'aque' zito'.

<sup>4</sup> Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

<sup>5</sup> Na' Jesúsen' gwnabde' legaque':

—¿Gaca' yetextilen' de chele?

Na' legaque' gose'ene':

—Gažen.

<sup>6</sup> Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxcen che Dios, nach bzojnen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'. <sup>7</sup> Leze zjano'e to chop bel ya'a, na' Jesúsen' be'e yela' choxcen che Diosen' che bel ya'a ca' na' leze goseyisen' che yogo'lol bene'. <sup>8</sup> Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an. <sup>9</sup> Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”, <sup>10</sup> na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

### Bene' fariseo ca' gosaclače' gon Jesúsen' to yela' guac da' yesele'ede' le'e yaba

(Mt. 16:1-4; Lc. 12:54-56)

<sup>11</sup> Na' bene' fariseo ca' gosezolagüe' chesedildiže' len Jesúsen'. Na' da' gosaclače' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'.

<sup>12</sup> Jesúsen' bebanchgüede' na' gwne':

—Ba ble'ele chona' yela' guac. ¿Bixchen' chnable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

<sup>13</sup> Nach bcua'ane' legaque' na' beyo'e lo' barcon' beze'e beyeje' yešla'a nesdaon'.

### Levadura che bene' fariseo ca'

(Mt. 16:5-12)

<sup>14</sup> Bene' ca' zjanaque' Jesúsén' txen gosanaže' yeso'e da' yesagüe', na' totec yetextil zjano'e lo' barcon'. <sup>15</sup> Na' Jesúsén' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

<sup>16</sup> Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

<sup>17</sup> Jesúsén' gocbe'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Bina' šejni'ile, neca chacbe'ele? ¿Nac chach lažda'olen' bi chejle'le? <sup>18</sup> ¿Bi chle'ele len yejlaole, neca chenele len nagle? ¿Bi chjayze'ele? <sup>19</sup> Gwdisa' gayo' yetextil na' goquen che gayo' mil bene', na' ¿bi chjayze'ele yebale žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

<sup>20</sup> —¿Chixe caten' gwdisa' gaže yetextilen' lao tap mil bene'? ¿Yebale žome gwža'te dan' botoblen'?

Na' gosene':

—Gaže žomen'.

<sup>21</sup> Nach gože' legaque':

—¿Bina' šejni'iczele na'a cho'a diža' che dan' chososed chosolo'e bene' fariseo ca'?

### Jesúsén' beyone' to bene' lchol bene' Betsaida

<sup>22</sup> Gwdechle besežine' Betsaida na' jasesane' to bene' lchol lao Jesúsén', na' gosata'yoede' le' yeyone' le'. <sup>23</sup> Na' bexue' taca' bene' lchola' na' gwleje'ne' yež. Nach gwdebe' xene' yejlagüen' na' gwxo'a taquen' yichje' na' gwñabde'ne' še chle'ede' late'. <sup>24</sup> Bene' lchola' gwne'e na' gwne':

—Chle'eda' bene', na' chle'eda'ne' ca' yag, perw chesa'aque'.

<sup>25</sup> Nach Jesúsén' bexoa taque' yejlagüen' da' yoble, na' gwña'yane' ben' na' beyaque', bele'etede' yogo' binlo'. <sup>26</sup> Nach Jesúsén' besele' le' liže', gože'ne':

—Bi yeyo'o lagüe yežen', neca no yo'o da' nga.

**Pedron' gwne' Jesúsén' naque' Cristo ben' gwlej Diosén' cont nabi'e***(Mt. 16:13-20; Lc. 9:18-21)*

<sup>27</sup> Gwdena' gwey Jesúsén' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwñabde' bene' ca' zja'aclen le':

—¿Bi chesena bene'? ¿Non' naca' neda'?

<sup>28</sup> Legaque' gose'ene':

—Bale' chesene' naco' Juan ben' bzoa bene' nis, yebale' chesene' naco' Elías, na' yebale' chesene' naco' yeto bene' be' xtiža' Dios cani'.

<sup>29</sup> Na' gwñabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosén' cont nabi'o.

<sup>30</sup> Nach Jesúsén' gože' legaque' nono yese'e ca'.

**Jesúsén' gwdixjue'ede' gate'***(Mt. 16:21-28; Lc. 9:22-27)*

<sup>31</sup> Na' gwzolao Jesúsén' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwsela' Diosén' golja' benach.

Na' bene' blao ca' chesenabia' nación chechon' na' bxož gwñabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

<sup>32</sup> Da' nga gwnen' zaca'laon. Na' Pedron' gwche'e Jesúsén' ga nac lchojiže' na' gwzologüe' chdile' le' dan' gwne' ca'. <sup>33</sup> Perw Jesúsén' gwechje' na' gwne'e bene' ca' zjanaque' le' txen, na' gwdile' Pedron', gože'ne':

—iGwcuase ca'ale Satanás! Bi nsa'o xbab che Diosén' san nsa'o xbab che benach.

<sup>34</sup> Nach Jesúsén' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyala' chojyichj cuine', la'czla' saca'zi'e, na' gone' can' nia' neda'. <sup>35</sup> Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne chia' neda' o neche xtiža' Diosén', ba de yela' mban che' toli tocane. <sup>36</sup> ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocane?

<sup>37</sup> Le bi zoa nacle gon benachen' chixjue' cont gata' yela' mban che' toli tocane. <sup>38</sup> Bene' ca' že' na'a bi chesejnilaže' Diosén' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Dios golja' benach.

Yeto'eda' che' cate' yida' da' yoble nsa'a yela' zaca' juisyw che Xa' Diosen' na' nchia' bene' ca' zjanac angl che'.

**9**<sup>1</sup> Lecze gož Jesúsen' legaue':  
—Da' li žia' le'e, balle nita'le nga na'a bina' gatle cate' žin ža le'ele Diosen' gwlo'e yela' guac xen chen' can' chnabi'en'.

**Bša' Jesúsen' ca goque'**  
(Mt. 17:1-13; Lc. 9:28-36)

<sup>2</sup> Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaue'. Na' nite' besele'ede' bža' ca goc Jesúsen'. <sup>3</sup> Xalane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xalanen'. <sup>4</sup> Na' concze besele'ede' da' Elías na' da' Moisés chosošalje' len Jesúsen'. <sup>5</sup> Nach Pedron' gože' Jesúsen':

—Maestro, ileca güenna' zoacho nga! Gonto' šone ranšw, to chio', to che Moisés, na' yeto che Elías.

<sup>6</sup> Le bene' ca' zja'aclen Jesúsen' besežebchgüe', na' Pedroa' bi chache'ede' bin' že'. <sup>7</sup> Nach gwche' to bejw gan' niten' gwyečhjen legaue', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

<sup>8</sup> Na' cate' gosene'e cue'ej cuiten' notno besele'ede', san toze Jesúsen' zie'.

<sup>9</sup> Na' šlac chesyeyetje' lo ya'an, Jesúsen' gože' legaue' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwsela' Dios golja' benač, cana' güe'le diža' chen.

<sup>10</sup> Da'nan' gomezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'. <sup>11</sup> Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyala' yide' da' yoble cate' za' yedenabia' ben' sela' Diosen'. ¿Bixchen' chesene' ca'?

<sup>12</sup> Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'lol da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwsela' Dios golja' benač? Žan saca'zi'a na' bene' zan bi yesejnilaže' neda'. <sup>13</sup> Na' žia' le'e, Elías ba bide' na' gosonde' le' con ca' gosaclaže', can' nyoj le'e Xtiža' Diosen' žan can' cheyala' gac che'.

**Jesúsen' beyone' to bi' yo'o nyazbe' da' xigüe'**  
(Mt. 17:14-21; Lc. 9:37-43)

<sup>14</sup> Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyečhjde' legaue', na' len bene' ca' chososed chosolo'ede' dan' bzoj da' Moisés chesedildiže' len legaue'.

<sup>15</sup> Na' cate' bene' ca' besele'ede' Jesúsén', yogüe' besyežejde' na' ja'acsese' bosoguape' le' tiox. <sup>16</sup> Nach gwnabde' legaque':

—¿Bin' chdildiža'le len bene' ca'?

<sup>17</sup> Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi' chac nebe'. <sup>18</sup> Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwnaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

<sup>19</sup> Na' Jesúsén' gože' bene' ca' že'na':

—iLe'e bene' bi' chejnilaže'! ¿Šna chyažjen soalena' le'e cont šejnilaže'le? ¿Batca' zelao na'lagua' le'e? Le yedesambe' nga.

<sup>20</sup> Na' jasesane'be', na' cate' da' xigüen' ble'en Jesúsén', benen gwyazbe' šon, na' gwbiŋbe' lo yo, chbiŋ chtoŋbe' na' chbia bžina' cho'abe'. <sup>21</sup> Nach Jesúsén' gwnabde' xaben':

—¿Baŋ iz ba goc chacbe' ca'?

Na' xaben' gwne':

—Cate' nacbe' bida'ote gwzolao chacbe' ca'. <sup>22</sup> Na' zan ni'a da' xigüen' chžalan' lebe' lo yi' na' lo nis cont goten lebe'. Da'nan' še guac yeyono'be', beyaše'sque neto' na' beyombe'.

<sup>23</sup> Jesúsén' gože'ne':

—Cheyaŋa' šejnilažo' neda', le yogo' da' chzelaže' bene' chesejnilaže' neda' chaquen.

<sup>24</sup> Nach xaben' gwne' zižje:

—iChejnilaža' le', goclen neda' šejnilaže'cha'!

<sup>25</sup> Na' cate' Jesúsén' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi' chenebe' na' bi' chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

<sup>26</sup> Na' da' xigüen' benen ga bosya'abe' na' benen ga gwyazbe' ca' yeto šon, nach bechojen. Na' bin' bega'anbe' ca' bi' guat, na' zan bene' gosene' gotben'. <sup>27</sup> Perw Jesúsén' bexue' taca'ben' cont beyasbe', nach gwzechabe'.

<sup>28</sup> Nach cate' Jesúsén' gwyo'e to lo' yo'o, bene' ca' zjanaque' le' txen gosebeje' le' ca' to lchojiže' na' gosenabde' le':

—¿Bixchen' bi' goc neto' yebejto' da' xigüen'?

<sup>29</sup> Na' gože'ne':

—Cont yechoj da' xigüen' nac ca' cheyaŋa' gonle gwbas na' soatezle yol güižle Dios.

**Da' yoble Jesúsén' gwne' gate'***(Mt. 17:22-23; Lc. 9:43-45)*

<sup>30</sup> Cate' besyeya'aque' na', besyedie' distritw Galilea. Na' Jesúsén' goclaže' nono yeseneze, <sup>31</sup> le chzejni'ide' bene' ca' zjanaque' le' txen, che'e legaque':

—Nedan' naca' ben' gwsela' Dios golja' benach, yosodie' neda' lo na' bene' yesote'nda', perw yeyon ža yebana' ladjo bene' guat ca'.

<sup>32</sup> Perw bi gosejni'ide' bin' gože' legaque', na' besežebe' yesenabde'ne'.

**Gosedildiže' gosene' noen' nac bene' blaoch***(Mt. 18:1-5; Lc. 9:46-48)*

<sup>33</sup> Na' besežine' ciuda da' nzi' Capernaum, na' cate' besežine' yo'o gan' zoa Jesúsén' gwñabde' legaque':

—¿Bixchen' chdildiža'le chanez?

<sup>34</sup> Perw con gosenite' šižize, le chanezan' gosedildiže' gosene' noen' nac bene' blaoch. <sup>35</sup> Nach Jesúsén' gwchi'e na' goxe' bene' šižinw ca' zjanaque' le' txen, na' gože' legaque':

—Še no le'e chaclaže'le gacle bene' žialao, cheyala' gonle xbab bibi zaca'teclé, na' cheyala' gon cuinle ca xmos yogo' bene' lježle.

<sup>36</sup> Nach bešue' to bidao' na' bzeche'be' gachol' legaque', na' gwlene'be' na' gože' legaque':

<sup>37</sup> —Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

**Bene' bi chon chio' contr, txencza' chone' chio'***(Mt. 10:42; Lc. 9:49-50)*

<sup>38</sup> Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto' gone' ca', le bi chone' chio' txen.

<sup>39</sup> Na' Jesúsén' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela' ya' chia'. <sup>40</sup> Le bene' bi chone' chio' contr, txencza' chone' chio'. <sup>41</sup> Chnia' le'e to da' zejen, note'teze bene' gone' le'e la' to xiga'ze nis da' ye'ejle neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

**Bitw co'yela'cho bene' gone' da' xinj***(Mt. 18:6-9; Lc. 17:1-2)*

<sup>42</sup> 'Note'teze bene' chon cont lažo' to bene' za' gwzolagüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nesdaon' clel ca da' gone' cont lažo' bene' yoble gone' da'



xinjen'. <sup>43</sup> Na' še yena'len' chonen cont gonle da' xinj, cheyala' cuejyichjle da' malen' chonle. Yejni'a bibi na'le zoa clél ca gonle da' xinjen' len len. Na' yejni'a šjayzoale len Diosen' toli tocane bi zoa šla'a taca'le clél ca yeyejle lo yi' gabil dan' bi cheyol chenit nya' cuerp chelen'. <sup>44</sup> Na' gabilen' neca chesat bzogan', neca cheyol yin'. <sup>45</sup> Na' še ni'alen' chonen ga gonle da' xinj, lecze cheyala' cuejyichjle da' malen' chonle. Yejni'a bibi ni'alen' zoa clél ca gonle da' xinjen' len len. Na' yejni'a šjayzoale len Diosen' toli tocane bi zoa šla'a ni'alen', clél ca yeyejle lo yi' gabil dan' bi cheyol chenit nya' cuerp chelen'. <sup>46</sup> Na' gabilen' bzoga' ca' bi chesatba', neca cheyol yin'. <sup>47</sup> Na' še yejlaolen' chonen cont gonle da' xinj, cheyala' cuejyichjle da' malen' chonlen'. Yejni'a bibi yejlaolen' žia clél ca gonle da' xinjen' len len. Na' yejni'a šjayzoale len Diosen' toli tocane zoa šla'aze yejlaole clél ca yežinle lo yi' gabilen' žia chop la'a yejlaolen'. <sup>48</sup> Ca nac gabilen', bi chesat bzogan', neca cheyol yin'.

<sup>49</sup> 'Le dan' chyi chzaca'le yežlio nga chzejni'in le'e cont bi yeyejle lo yi' gabil. Na' da' chyi chzaca'le zaca'leben ca zede' da' cheyala' chixe' yezj yogo' ni'a cate' chjasesane' yezj lao Diosen'. <sup>50</sup> Na' zeden' naquen güen, perw še bich bi zxi' naquen, ĩnacxe goncho cont yeyaquen zxi' da' yoble? Na' le'e cheyala' gwyo gwchejlaže'le dan' chyi chzaca'le na' cheyala' soale binlo tole yetole, na' še soale ca', zaca'leble ca to yela' guagw da' yo'o zede'.

### Jesúsen' bzejni'ide' bi cheyala' yela'acho len no'ol checho

(Mt. 19:1-12; Lc. 16:18)

**10** <sup>1</sup> Jesúsen' beze'e Capernaum na' gwejche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'. <sup>2</sup> Nach bal bene' fariseo ca' ja'aque' gan' zoa Jesúsen' gosaclačže' yesebeje'ne' diža' da' yosočhine' cont yosožie'ne' xya chol, na' gosēnabde'ne' še guac to bene' yele'e len no'ol che'. <sup>3</sup> Na' Jesúsen' boži'e xtižen', gwne':

—Ca nac dan' bzoj da' Moisésen', ĩnac bene' mandadw gonle?

<sup>4</sup> Legaque' gosene':

—Moisésen' gwne' cate' to bene' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

<sup>5</sup> Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'. <sup>6</sup> Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: “Bene' legaque', to bene' byo na' to no'ole.”

<sup>7</sup> “Da'nán' bene' byon' gwsane' xaxne'e cont soalene' no'ol chen', <sup>8</sup> na' chope' yesaque' ca toz bene'.” Na' ca' bich yesac chope' san toze'.

<sup>9</sup> Da'nán' bi cheyala' yesyele'e, le Diosen' ba bcode' legaque'.

<sup>10</sup> Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'. <sup>11</sup> Na' Jesús'en' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca naquen šaca' gata'lene' no'ol che' bene' yoble. <sup>12</sup> Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonen'.

**Jesús'en' gwñabde' Diosen' gac güen che bidao' ca' besežag**

(Mt. 19:13-15; Lc. 18:15-17)

<sup>13</sup> Nach jasesane' bi' bixjw lao Jesús'en' cont xoa ne'e yichjgacbe', perw bene' ca' zjanaque' le' txen gosedile' bene' ca' zjanche'ebe'. <sup>14</sup> Na' cate' ble'e Jesús'en' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogaque'. <sup>15</sup> Da' li žia' le'e, note'teze bene' cheyała' yosozenague' che Diosen' ca cheson bidao' cate' chosozenagbe' che xaxna'be', le bene' bi yosozenague' ca', gwbat nabia' Diosen' yichjlažda'ogaque'.

<sup>16</sup> Nach gwlene' to to bidao' ca' na' gwñabde' Diosen' gac güen chebe', gwxo' taquen' yichjbe'.

**To bene' güego' bšaljlene' Jesús'en'**

(Mt. 19:16-30; Lc. 18:18-30)

<sup>17</sup> Cate' Jesús'en' gwze'e ngüe'e nez, chxonjses to bene' jazoa xibe' lagüen' na' gwñabde'ne':

—Maestro, le' naco' bene' güen. ¿Bi cheyała' gona' cont gata' yela' mban chia' toli tocane'?

<sup>18</sup> Jesús'en' gože'ne':

—¿Bixchen' žo' naca' bene' güen? Toze bene' güen zoa, na' len' Dios.

<sup>19</sup> Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježle; bi siye'le bene'; le gap bala'an xaxna'le.”

<sup>20</sup> Na' boži'e xtižen':

—Maestro, yogo' da' quinga chzenaga', gwzolagua' chonzan' cate' ne' nactia' bidao'.

<sup>21</sup> Jesús'en' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

<sup>22</sup> Na' cate' bene ben' dan' gwna Jesús'en', gocde' leca zdebe naquen gone' can' gože'ne', na' beza'yaše', le bene' gwñi'achgua goque'.

<sup>23</sup> Nach Jesúsen' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

<sup>24</sup> Na' bene' ca' zjanaque' le' txen besyebande' can' gwnen', perw Jesúsen' goze'e legaque':

—Xi'ina', bene' chesacde' zaca'chgua yela' gwni'a chegaquen', leca zdebe naquen yosozenague' che Diosen' cont nabi'e yichjlažda'ogaquen'.

<sup>25</sup> Bedao'ch te to be xen be nzi' camello to lo' nag yeše' clal ca to bene' gwni'a gwzenague' che Dios cont Diosen' nabi'e yichjlažda'ogüe'.

<sup>26</sup> Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

<sup>27</sup> Jesúsen' gwne'e legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' nacho da' bi gac gon Dios.

<sup>28</sup> Nach Pedron' gože'ne':

—Neto' ba gwlejyichjto' yogo' da' de cheto' cont nacto' le' txen.

<sup>29</sup> Jesúsen' boži'e xtižen':

—Da' li žia' le', note'teze bene' ba gwlejyichje' liže', bene' biše', zane', xe', xne'e, no'ol che', xi'ine', o yežlio che' ne chia' neda' na' neche chzenague' xtižan', <sup>30</sup> yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli tocanē. <sup>31</sup> Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

### Da' yoble Jesúsen' gwne' yesote'ne'

(Mt. 20:17-19; Lc. 18:31-34)

<sup>32</sup> Zjangüe'e nez zja'aque' bso dan' zoa gała'ze Jerusalénna' na' Jesúsen' žialagüe' lao bene' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' bene' šižinw ca' ca'ale ga nac lchojiže' na' gože' legaque' can' gac chen'. <sup>33</sup> Gože'ne':

—Na'a ba zejcho Jerusalén gan' yesone' neda' lo na' bxož gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwsela' Dios golja' benach.

<sup>34</sup> Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo bene' guat ca'.

### Jacobo na' Juan gosenabe' to goclen lao Jesúsen'

(Mt. 20:20-28)

<sup>35</sup> Nach Jacobo len Juan, bene' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabto'.

<sup>36</sup> Na' gwṇabe Jesúsēn' legaque':

—¿Bi che'nele gona'?

<sup>37</sup> Na' gose'ene':

—Ben cont cue'to' šla'a güeje cuito'na' cate' solao nabio'.

<sup>38</sup> Nach Jesúsēn' gože'ne':

—Le'e cabi nezele bi dan' chñable. ¿Gwṇchejlaže'le tele yela' zi' yela' ya' ca dan' tia' neda' na' gac chele can' gac chia'?

<sup>39</sup> Legaque' gose'ene':

—Gwṇchejlaže'to'.

Na' Jesúsēn' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'. <sup>40</sup> Perw bi naquen lo na' nia' non' cue' cuitan' cate' žin ža nabia, san yesebe' beñe' ba mbej Diosēn' gaquen che'.

<sup>41</sup> Cate' yeši beñe' ca' zjanaque' le' txen gosende' xtiža'gaquen', beseloque' Jacobon' na' Juanna'. <sup>42</sup> Perw Jesúsēn' goxe' yogüe' cont gosebigue' laogüēn' na' gože' legaque':

—Nezeczēle beñe' zjambeje' cont chesenabi'e to to nación na' beñe' blao ca' chesone' byen chosozēnag beñe' chegaque'. <sup>43</sup> Perw bi naquen ca' len le'e. San note'tezle chaclaže'le gacle beñe' blao, cheyała' gwzēxjwlaže'le gaclēnle beñe' lježle. <sup>44</sup> Na' note'tezle chaclaže'le gacle beñe' žialao, cheyała' gon cuinle ca xmos yogo' beñe' lježle. <sup>45</sup> Le lencze neda', gwsēla' Diosēn' neda' golja' beñach, gague za'a cont yesaclen beñe' neda', san za'a cont gaclēna' beñe', na' gwnežjw cuina' yesote' neda' neche xtoła' beñachen'.

### Jesúsēn' beyone' to beñe' lchoł ben' gože' Bartimeo

(Mt. 20:29-34; Lc. 18:35-43)

<sup>46</sup> Nach besežine' Jericó. Na' cate' Jesúsēn' ba beze'e ciudan' len beñe' ca' zjanaque' le' txen na' len yezanch beñe', do cho'a ciudan' chi' to beñe' lchoł chanez chñabe' yosonežjo beñe' le' con gaca' da' chesēzande'. Bena' le' Bartimeo na' naque' xi'in to beñe' le' Timeo. <sup>47</sup> Na' beñe' lchoła' cate' gocbe'ede' gwde Jesús beñe' Nazaret gan' chi'ena', gwzolağüe' gwne' zižje gwne':

—iJesús, xi'in diaža che da' rey David, beyaše'laže'sca neda'!

<sup>48</sup> Beñe' zan gosēdile' le' cont bich yosye'e, perw bosya'adiache' gwne':

—iXi'in diaža che da' rey David, beyaše'laže'sca neda'!

<sup>49</sup> Nach Jesúsēn' gwleze' na' gwne':

—Le gaxe'.

Nach gosaxe' beñe' lchoła' na' gose'ene':

—Benchachlažo', gwzoža', le chaxe' le'.

<sup>50</sup> Nach gwcho'one' lache' da' nṇoa cože' na' bxite' jabigue' lao Jesúsēn'.

<sup>51</sup> Nach Jesúsēn' gwñabde' le':

—¿Bi chaclažo' gonda' le'?

Beñe' l̄choḷa' boži'e xtižen':

—Maestro, che'nda' ye'le'eda'.

<sup>52</sup> Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete beñe' l̄choḷa', na' gwda'ogüe' Jesúsen'.

### Jesúsen' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

**11** <sup>1</sup> Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop beñe' ca' zjanaque' le' txen mandadw, <sup>2</sup> gožgaque'ne':

—Le šja'ac yež dan' chi' gaḷa'ze, na' cate' žinlen' na' yeželele to burr dao' da'ba' yag be nono na' cuia. Le sežba' na' le che'ba' nga. <sup>3</sup> Na' še no chñab bičen' chonle ca', le ye'e: “Xanto' chyažjde'ba'”, na' la' gwzantecze'ba'.

<sup>4</sup> Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

<sup>5</sup> Na' baḷ beñe' ca' nita' na' gose'ene':

—¿Bixen' chonle? ¿Bixchen' chsežle burron'?

<sup>6</sup> Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseche'eba'. <sup>7</sup> Nach goseche'e burron' lao Jesúsen' na' gosexoa xagaque' cože'ban' na' gwžia Jesúsen' leba'. <sup>8</sup> Na' beñe' zan gosonxene' Jesúsen' goseyixjw no xagaque' lo nez cont blej burron' len na' yebaḷe' gosechogue' xoze' yag na' goseyixjuen' lo neza'.

<sup>9</sup> Beñe' zjažialao na' lecze beñe' za'ac cože' gosezolagüe' bososye'e, gosene':

—iLeca zaca'chgua benga! iMbalaz ben' za' nga nseḷa' Xancho Diosen' le' cont nabi'e! <sup>10</sup> iMbalaz yeḷa' gwnabia' che' da' nse'e, le' nabi'e ca da' xoxxta'ocho David! iLeca zaca'chgua Dios ben' zoa yaban'!

<sup>11</sup> Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol da' de na', beyeje' Betania len beñe' šižinw ca' ba gwleje' cont zjanaque' le' txen, le ba zoa gal.

### Jesúsen' gwne' gacxi'a yag yixgüigw da' bibi žia

(Mt. 21:18-19)

<sup>12</sup> Beyečj ža cate' besyeya'aque' Betania, Jesúsen' gwdone'. <sup>13</sup> Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'. <sup>14</sup> Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' beñe' ca' zjanaque' le' txen gosende' can' gwnen'.

**Jesúsen bešaše' beṇe' ca' cheson ya'a chyo'o yodaon'**

(Mt. 21:12-17; Lc. 19:45-48; Jn. 2:13-22)

<sup>15</sup> Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzolaḡiue' bešaše' beṇe' ca' chesote' na' beṇe' chesa'o na'. Na' bchiḡe' xmes beṇe' ca' chosoša' mechw na' yag ga chesebe' beṇe' ca' chesote' ngolbex. <sup>16</sup> Na' bi be'e latje yesexoa xnez beṇe' zjanao' yoa' chyo'o yodaon'. <sup>17</sup> Na' bsed blo'ede' beṇe' ca' že' na', gože'ne':

—Nyojczy Xtiža' Diosen' žan: “Yesene' ližan' naquen latje gan' šja'ac beṇe' yogo' nación yosol güiže'nda”, perw le'e ba benlen ca to latje ga že' beṇe' gwban.

<sup>18</sup> Na' bḡoz gwnabia' ca' na' beṇe' ca' chososed chosolo'e dan' bzoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' beṇe' besyežejde' can' bsed blo'eden'.

<sup>19</sup> Perw na' cate' goḷ, Jesúsen beze'e ciudan'.

**Gwbiž yag yixgüigon'**

(Mt. 21:20-22)

<sup>20</sup> Beyechj ža šezil, gosodie' na' besele'ede' yag yixgüigon' ba gwbižen lente loen. <sup>21</sup> Nach Pedron' jayze'ede' na' gože' Jesúsen':

—Maestro, gwna' yag yixgüigw dan' gwnao' gacxi'an, ba gwbižen.

<sup>22</sup> Jesúsen' boži'e xtižen':

—Le šejnilaže' Dios. <sup>23</sup> Da' li žia' le'e, note'teze beṇe' ye'e ya'a nga: “Gwcuase nga na' jayzoa lo' nisdao”, še bi chacžejlaže' lo' yichjlažda'ogüe', san chejnilaže' Diosen', guacczen. <sup>24</sup> Da'nan' žia' le'e, yogo'te da' nable cate' choḷ güižle Dios, le šejle' guaquéczen, na' le gacczen. <sup>25</sup> Na' cate' choḷ güižle Dios, še zoa da' chac chele len beṇe' yoble, le yezi'xen che', cont lecze ca' Xacho Dios ben' zoa yaba yezi'xene' che xtoḷa'le. <sup>26</sup> Perw še le'e bi yezi'xenle che beṇe', Xacho Dios beṇe' zoa yaba bi yezi'xene' che xtoḷa'le.

**Yela' gwnabia' che Jesúsen'**

(Mt. 21:23-27; Lc. 20:1-8)

<sup>27</sup> Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bḡoz gwnabia' ca' na' beṇe' ca' chososed chosolo'e dan' bzoj da' Moisés na' len beṇe' gole blao' ca' chesenabi'e naciónna'.

<sup>28</sup> Na' gosenabde' le':

—¿Bi yela' gwnabia' napo' chono' da' qui? ¿No beṇ yela' gwnabian' cont chonon'?

<sup>29</sup> Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach nia' le'e bi yela' gwnabia' chonlendan'. <sup>30</sup> ¿No gwseḷa' da' Juanna' bzoe' beṇe' nis? ¿Dios nan' gwsele'ne' še benachen'? Le yoži'i xtižan'.

<sup>31</sup> Nach legacze' gose' lježe':  
—Še ye'chone' Dios gwsele' le', na' ye'e chio': “¿Bixchen' ca gweyjl'e che'?” <sup>32</sup> Bi gac ye'chone' benach gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

<sup>33</sup> Nach gose'e Jesúsen':

—Bi nezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

### Jempl che bene' güen žin ben' gosaque' bene' mal

(Mt. 21:33-46; Lc. 20:9-19)

**12** <sup>1</sup> Nach Jesúsen' gwzologüe' choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gweyje' zito'. <sup>2</sup> Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlacw coseš dan' yesyezi'en'. <sup>3</sup> Perw na' bene' ca gosezene' mosen' gosot goseyine'ne', na' to ga'alze' bosyose'ene' bibi goso'ene'. <sup>4</sup> Nach xan yežlion' da' yoble gwsele' yeto xmose'; perw benga bosožie'ne' yej, gosone' güe' yichje' na' gosonde' le' zgot. <sup>5</sup> Nach xan yežlion' gwseła'che' yetoe', na' benga gosottecze'ne'. Gwdena' gwseła'che' bene' zan, na' bale' gosot goseyine' le' na' yebale' gosottecze'ne'.

<sup>6</sup> 'Ne' zoa yeto bene' bina' sele', bena' xi'ine' bene' chacchgüede', na' bzebte gwsele' le', le bene' xbab: “Yesezi'e xtižen'.” <sup>7</sup> Perw bene' ca' gose' lježe': “Bengan' yega'anlene' yežlio nga cate' gat xen'. Le da gotchone' cont yega'anlenchon.” <sup>8</sup> Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

<sup>9</sup> Nach Jesúsen' gwnabe':

—¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

<sup>10</sup> '¿Bina' gwlable ga nyoj Xtiža' Diosen'? žan quinga:

Yej dan' bi gosaclačže' bene' güen yo'o ca' yosochine',  
len ba naquen yej squin.

<sup>11</sup> Da' nga ben Xancho Dios, na' naquen to da' yežejecho.

<sup>12</sup> Nach gosaclačže' yesezene' Jesúsen', le gosacbe'ede' be'e jemplna' neche dan' bi chesejnilaže' le'. Perw besežebe' še bi yesone bene' ca' nžaguen' legaque', da'nan' bosocua'ane'ne' na' besyeya'aque'.

**Ca nac che dan' cheyała' gaxjw**

(Mt. 22:15-22; Lc. 20:20-26)

<sup>13</sup> Gwdena' goseselē' bal bene' fariseo na' bal bene' ca' gosedā' Herodes cont yesebeje' Jesúsēn' diža' da' yosode'ede' cont yesagüe' xya che'.

<sup>14</sup> Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono' len note'teze bene'. Na' nezeto' diža' li cho'o chsed chlo'edo' bene' can' chazlaže' Diosēn' goncho. Da'nān' zedenabeto' le' inaquen binlo no chixjo da' cheyała' chixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi chixjwton'?

<sup>15</sup> Jesúsēn' gocbe'ede' gague do lažen' chese'ene' ca', san chesaclačže' yesonlede' le' len xtiža'gaquen', nach gože'ne':

—¿Bixchen' chaclaže'le yoslačže'le neda' len xtižan'? Le gon neda' to mechw cont na'an.

<sup>16</sup> Na' goso'enen', na' cate' ble'eden' na' Jesúsēn' gwnabde' legaque':

—¿No lao dan' da' le'e mechw nga? na' ino la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

<sup>17</sup> Nach Jesúsēn' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

**Gosenabde' le' bi zejen dan' yesyeban bene' guat ca'**

(Mt.22:23-33; Lc. 20:27-40)

<sup>18</sup> Nach besežin bal bene' saduceos gan' zoa Jesúsēn'. Bene' ca' chesene' bene' guaten' bich yesyebane'. Nach gosenabde' le', gose'ene':

<sup>19</sup> —Maestro, da' Moisésēn' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyała' yošagna'lēne' no'ol güezeba' cont yesenita' xi'in diaža che da' bišen'. <sup>20</sup> Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>21</sup> Na' bene' gwchopa' bošagna'lēne' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. <sup>22</sup> Na' ca' goc gosedāš bene' gaža' bosošagna'lēne' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca beyožen got len no'ola'. <sup>23</sup> Gož neto', cate' yesyebane' ladjo bene' guat ca' inox bene' ca' soalene' no'ola' ca xo'ole'? le yogo' bene' gaža' bosošagna'lēne' le'.

<sup>24</sup> Nach Jesúsēn' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'. <sup>25</sup> Cate' yesyeban bene' guat ca'



bich yosošagna' bene', neca yosonežjo xi'ine' no'ol gwšagne'e, le yesaque' ca angl bene' zjazoa yaba. <sup>26</sup> Na' ca nac dan' yesyeban bene' guat ca', ĩbina' gwlable gan' bzoj da' Moisés, can' gož Diosen' le' caten' bol güiže'ne' to lo yag yeše' dao' da' chey? Gože'ne': "Neda' naca' Dios ben' chonxen Abraham, ben' chonxen Isaac, na' ben' chonxen Jacob." <sup>27</sup> Bene' guat ca' bi chesonxene' Diosen', san bene' zjamban. Na' ca nac le'e, leca clelen' chonle xbab.

### Da' nac da' žialao da' cheyała' goncho

(Mt. 22:34-40)

<sup>28</sup> Leze bžin to bene' bsed blo'ede' ley dan' bzoj da' Moisés, bene' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwñabde'ne':

—ĭNon' nacch da' žialao da' zjanyojen da' ža Diosen' cheyała' goncho?

<sup>29</sup> Jesúsen' boži'e xtižen' gože'ne':

—Da' nga nacch da' žialao lao yogo'lolen, žan: "Le gwzenag bene' Israel gualaž chia', toze Xancho Dios naque' bene' zaca' gonxencho.

<sup>30</sup> Da'nan' cheyała' gaquecho Xancho Diosen' con ca zelao chejni'icho, do yichj do laže'cho, do fuerz valor checho." Lenna' naquen da' žialao lagüe da' ca' ža Diosen' cheyała' goncho. <sup>31</sup> Na' da' gwchopen' zejgałan' ca', gan' žan': "Cheyała' gaque lježcho ca chaque cuincho." Bich bi de da' že' cheyała' goncho da' zaca'ch ca da' qui.

<sup>32</sup> Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxenchone', na' noch no zoa bene' zaca'ch ca le'. <sup>33</sup> Na' še gaquecho Dios, con ca zelao chejni'icho, do yichj do laže'cho, do fuerz valor checho, na' gaque lježcho ca chaque cuincho, lenna' zaca'chen ca yogo' da' choncho chotcho no beyixe' na' chzeychoba' chonxencho Diosen'.

<sup>34</sup> Nach cate' gocbe'e Jesúsen' boži'icze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'oguon'.

Na' ne yetoe' bich beseyaxjde' bichle yesenabde' Jesúsen'.

### Criston' naque' xi'in diaža che da' rey David

(Mt. 22:41-46; Lc. 20:41-44)

<sup>35</sup> Jesúsen' bsed blo'ede' chy'o yodaon', gwne':

—ĭNacxečen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David? <sup>36</sup> Cuin Daviden' gwne' can' blo'e Spiritw che Diosen' le':

Xancho Dios gože' Xanan':

"Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yichje' yosozenague' chio'."

<sup>37</sup> ¿Nacxe gac nacho Criston' naque' xi'in diaža che da' David? le cuin Davin' gože' le': "Xana".

Na' zjanyanchgua bene' ca' chosozenag xtižen', na' besyebede' xtižen'.

**Jesúsen' bcuiše' bene' ca' chososed chosolo'e ley dan' bzoj Moisés**

(Mt. 23:1-36; Lc. 11:37-54; 20:45-47)

<sup>38</sup> Jesúsen' caten' chsed chlo'ede' legaque' gwne':

—Le gwsaca' cont bi gonle can' cheson bene' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap bene' legaque' bala'an cate' chesyěžague' lagüe ya'a.

<sup>39</sup> Chesyebede' chesebi'e gan' chesebe' bene' blao cate' chja'aque' yodao' na' cate' chac lni. <sup>40</sup> Legaque' cheseque'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' yesacche' castigw clal ca yezica'chle bene' güen da' xinj.

**To no'ol güezebe be'e Diosen' xmechue'**

(Lc. 21:1-4)

<sup>41</sup> Na' šlac zoa Jesúsen' chy'o yodaon', gwchi'e gala'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwni'a ca' chesegüe'e da' zcha'o mechw. <sup>42</sup> Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec. <sup>43</sup> Nach Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clal ca yogo' bene' ca' chesego'o mechw lo' cajan',

<sup>44</sup> le yogo' legaque' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

**Jesúsen' gwne' gwžin ža yosyočinje' yodao' blaon'**

(Mt. 24:1-2; Lc. 21:5-6)

**13** <sup>1</sup> Cate' cheza' Jesúsen' yodao' blaon' to bene' ca' zjanaque' le' txen gože'ne':

—iMaestro, gwnašc catec xdan zjanac yej qui na' yo'o qui!

<sup>2</sup> Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

**Can' gac cate' ba zoa yeyož yežlion'**

(Mt. 24:3-28; Lc. 21:7-24; 17:22-24)

<sup>3</sup> Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gose'ene' šižize:

<sup>4</sup> —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

<sup>5</sup> Jesúsen' boži'e xtižen', gwne':

—Le gwsaca' cont nono siye' le'e. <sup>6</sup> Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

<sup>7</sup> 'Na' cate' yenele chac gwdile nile nale, o yenele guac gwdile, bi žeble, le can' cheyala' gac. Perw gague lenna' nacho ba bžin ža yeyož yežlion'. <sup>8</sup> Le yesedil to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi'.

<sup>9</sup> 'Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' bene' yeseche'exoxje' le'e no lao rey no lao nochle bene' gwnabia', na' can' güe'lenle legaque' xtižan'. <sup>10</sup> Le za' te che yežlion', xtiža' Diosen' cheyala' gas laljen doxen yežlion'. <sup>11</sup> Na' cate' yesezene' le'e na' yeseche'e le'e lao bene' gwnabia' ca', bi cuec yichjle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyala' nale. <sup>12</sup> Cana' bal benach yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesot legaque'. <sup>13</sup> Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žin žate gatlé, nach šjayzoale len Diosen'.

<sup>14</sup> 'Da' Daniel ben' gwduxjue'ede' xtiza' Dios bzoje' che da' zbanchgua da' gwxinjen latje gan' chonxencho Diosen'. Na' cate' le'e le'ele ba zoa dan' gan' bi cheyala' soan, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.)

<sup>15</sup> Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'. <sup>16</sup> Na' bene' chda yixe' bi yeyej liže' šjayxi' xalane'. <sup>17</sup> iNyaše'chguaze zjanac no'ol ca' zjanao' xi'in, na' no'ol ca' ne' chosoguaže' bidao' lo ža ca'! <sup>18</sup> Le nab lao Dios bi yažjen gwxonjle caten' chac zag, <sup>19</sup> le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble. <sup>20</sup> Na' šaca' Xancho Diosen' bi yozaše' žan' yesac ca', notno yela,

perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

<sup>21</sup> 'Cana' še no ye' le'e: "Le našc, nga zoa Cristo ben' gwlej Diosen' cont nabi'e", o "Le našc, na' zoe'", bi šejle'le. <sup>22</sup> Le yesaš bene' gwxiye' bene' yesaclaže' yosolane' xlatja' nga, na' yeson cuine' ca bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. <sup>23</sup> Perw ca nac le'e, le gwzenag, le ba gwdixjue'eda' le'e yogo' can' gac.

### Can' gac cate' ben' gwsela' Diosen' golje' benačh yide' da' yoble

(Mt. 24:29-35, 42-44; Lc. 21:25-36)

<sup>24</sup> 'Perw ca nac ža ca' cate' yeyož gale'le can' gwnia', gwbižen' yeyaquen chol na' bion' bich gwsenin'. <sup>25</sup> Na' beljw ca' yeselažon' le'e yaban', na' yogo' da' chle'echo le'e yaban' yesaquen ca chac yežlion' cate' chxo'. <sup>26</sup> Nach bene' že' yežlion' yesele'ede' neda' naca' ben' gwsela' Diosen' golja' benačh za'a ladjo bejon' len yela' guac xen na' yela' bene' zaca' juisyw chian'. <sup>27</sup> Nach sela' angl chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

<sup>28</sup> 'Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en dao', nezele ba za' lagüe ba. <sup>29</sup> Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'. <sup>30</sup> Da' li žia' le'e, bina' yenit diaža che le'e nita'le na'a cate' yeyož gac yogo'lol da' ca'. <sup>31</sup> Le'e yaban' na' yežlion' yesede chen, perw ca nac xtižan', gague da' te cbi gac can' žanna'.

<sup>32</sup> 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toze Xa' Dios neze.

<sup>33</sup> 'Da'nan', le soa le cueze, le güia le na', na' le soateze yol güižle Dios, le nono neze batcan' žin ža. <sup>34</sup> Naquen ca nac che to bene' šeje' zito', na' cate' za' se'e chon liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'. <sup>35</sup> Le soa le cueze ca bene' chesape' liže'na', le bi zjanezde' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'. <sup>36</sup> Le xož yele'e zejzenez na' yedole'de' legaque' chesetase'. <sup>37</sup> Da' nga žia' le'e leze žiczan' par yogo'lol bene'. Le soa le cuez batcan' žin ža.

### Bosoxi'e yesezene' Jesúsén'

(Mt. 26:1-5; Lc. 22:1-2; Jn. 11:45-53)

**14** <sup>1</sup> Yečhop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' bxoz gwnabia' ca' na' bene' ca' chososed chosolo'e dan' bzoj da' Moisés cheseyiljwlaže'

nac yesone' yeseziye'e Jesúsen' cont yesezene'ne' yesote'ne'. <sup>2</sup> Perw gosene':

—Bi senchone' lo lnin' cont ca yesebec bene' žaš.

### To no'ole bzoe' set zix yichj Jesúsen'

(Mt. 26:6-13; Jn. 12:1-8)

<sup>3</sup> Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzojje' gan' yož seta' na' bzoachochje' seta' yichj Jesúsen'. <sup>4</sup> Na' bal bene' ca' zjanita' na' beseže'e, na' gose' lježe':

—¿Bixchen' benditjde' set zix nga? <sup>5</sup> Ša no bete' len güesonen ca no laxjw mos da' gone' gan tgiiz, na' gwnežjuen' gaclenen bene' yaše'.

Na' beseloque' no'ola'.

<sup>6</sup> Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen. <sup>7</sup> Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yesša len le'e. <sup>8</sup> No'ole nga bene' da' zelao gwzaque'de'. Ba bguazje' neda' set zix can' cheyała' yesone' len neda' cate' gaša'. <sup>9</sup> Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

### Judas gwchoglaže' gwdie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

<sup>10</sup> Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeje' jäne'e bxoz gwnabia' ca' cont yosoxi'e nac gone' gwdie' Jesúsen' lo na'gaque'. <sup>11</sup> Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzomagüe' gw diljwlaže' nac gone' gwdie' Jesúsen' lo na'gaque'.

### Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Na' bžin ža čala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjayza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenabde' le':

—¿Ga che'ndo' šjasini'ato' cont gagwcho xše' che pascon'?

<sup>13</sup> Nach gwsele' chop bene' ca' na' gože'ne':

—Le šja'ac ciudadn', na' yežagle to bene' byo no'e to che'e nis. Le šejlene', <sup>14</sup> na' gan' yežinen', le ye' xan yo'on: “Maestrona' že': Gonšco' to yo'o gan' gagwto' xše' ža lni nga len bene' ca' zjanaque' neda' txen.”

<sup>15</sup> Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

<sup>16</sup> Na' gosa'ac bene' ca' chope, na' besežine' ciudan', na' yogo' can' gož Jesúsen' legaque' goc, na' bososini'e xše' že' l̄nin'.

<sup>17</sup> Cate' beyož gwxa gwbiž, bžin Jesúsen' len bene' šižinw ca' gwleje' cont zjanaque' le' txen. <sup>18</sup> Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

<sup>19</sup> Nach legaque' besyeyaše'laže'de' na' gosezolagüe' tgüeje tgüeje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

<sup>20</sup> Na' Jesúsen' gože'ne':

—Ladjo le'e bene' šižinw, to bene' chagw len neda' txen toze lo' ye'en gon ca'. <sup>21</sup> Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' benach. Perw inyaše'chguaze nac ben' gwdie' neda' lo' na' bene' ca'! Yejni'acle ša bi goljen'.

<sup>22</sup> Na' šlac chesagüe', Jesúsen' gwxi'e to yetextilen', na' beyož be'e yela' choxclen che Dios, bzojxen', na' bnežjuen' legaque', gwne':

—Le gagon'. Lenna' cuerp chia'.

<sup>23</sup> Nach bexue' to vas gan' yože nis uvasen' na' beyož be'e yela' choxclen che Dios, be'en legaque', na' yogüe' gose'eje' late' güej dan' yože lo' vassen'. <sup>24</sup> Na' gože' legaque':

—Da' ngan' xchena' na' chzanlažan' laljen neche yogo'lol benach. Na' laljen cont solao gac da' coben' da' gwna Diosen' gone' gaclene' benach.

<sup>25</sup> Da' li' žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

### Jesúsen' gwne' Pedroa' bi chebe' naque' le' txen

(Mt. 26:30-35; Lc. 22:31-34; Jn. 13:36-38)

<sup>26</sup> Beyož gosole' gosonxene' Diosen' nach gosa'aque' ja'aque' Ya'a Olivos. <sup>27</sup> Nach Jesúsen' gože'ne':

—Na'aže' yogo'le cuejyichjle neda' neche dan' gac chian'. Le nyojzen le'e Xtiža' Diosen', žan: “Gota' bene' güeyoe xilan' na' xila' ca' yesaslasba'.” <sup>28</sup> Perw cate' yosban Diosen' neda' ladjo bene' guat ca', yobch yeya'a Galilea ca' le'e.

<sup>29</sup> Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

<sup>30</sup> Perw Jesúsen' gože'ne':

—Da' li' žia' le', bina' cuež jean' chop ni'a na'aže' cate' gac šon ni'a bi chchebo' še nombi'o neda'.

<sup>31</sup> Perw Pedroa' do laže' gwne':

—La'czla' še chonen byen guatlencza' le', gwbat n̄ia' bi nombia' le'.  
Na' lecze ca' gosena' yogüe'.

### Jesúsen' bol̄ güiže' X̄e' Dios Getsemaní

(Mt. 26:36-46; Lc. 22:39-46)

<sup>32</sup> Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le cue'edo' šlac neda' šjel̄ güiža' Dios.

<sup>33</sup> Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. <sup>34</sup> Na' gože' legaque':

—Lo' yichjlažda'ogua' nga chacyaše'chgüeda', chacda' gatcza' catequen' chžaglagua'. Nga le yega'an̄ na' le soa le na' txen len neda'.

<sup>35</sup> Nach Jesúsen' gwžialagüe' yelate' na' jachaze' coscho'ale lo yon' gwñabde' Dios še guac ten ca'ale bi gac can' ba zoa gac che'. <sup>36</sup> Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chñaba' gac da' žia' neda', san gac da' nao' le'.

<sup>37</sup> Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón ¿chtason'? ¿Ne šlož da'oze ca' goc cuejo' bišgal len neda'?

<sup>38</sup> Bi tasle, san le yol̄ güiž Dios cont bi gon gwxiyen' le'e gan. Da' li lo' yichjlažda'olen' chñalaže'le gonle da' nac binlo, perw cuerp chelen' bi chzoeczen.

<sup>39</sup> Nach gwyeje' da' yoble na' bol̄ güiže' Dios na' da' yoble gože'ne' dan' ba gožcze'ne' tñi'a. <sup>40</sup> Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. <sup>41</sup> Na' da' gwyone n̄i'a gwyeje' na' bezžine' gan' nita' bene' ca' šone na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to bene' neda' lo na' bene' güen da' xinj ca', neda' naca' ben' gwsela' Diosen' golja' benach. <sup>42</sup> Le chas, le yeyo'o. Ba za' ben' gon neda' lo na'gaque'.

### Gosezene' Jesúsen' cont yeseche'ene' lao bene' gwnabia' ca'

(Mt. 26:47-56; Lc. 22:47-53; Jn. 18:2-11)

<sup>43</sup> Jesúsen' ne' choe'te' dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' gosesela' b̄xoz gwnabia' ca' na' bene' gole blao ca' chesenabia' nación Israel cheton'. (Judasen' goque' to bene' šižinw ca' gwlej Jesúsen' cont zjanaque' le' txen.) <sup>44</sup> Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le'na'; le sene' na' le che'e.

<sup>45</sup> Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnope'ne'. <sup>46</sup> Nach gosezene' Jesúsen' cont yeseche'ene'.

<sup>47</sup> Perw to ben' zecha cuit Jesúsen' gwlej spada chen' na' gwɔinen' mos che bɔoz blaon' gwchogte' šla'a naguen'. <sup>48</sup> Nach Jesúsen' gože' bene' ca':

—¿Nonle neda' ca to bene' gwban za'acle zedexi'le neda' len spada na' len yag? <sup>49</sup> Yogo' žaze gwzoo' len le'e bsed blo'eda' bene' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

<sup>50</sup> Nach yogo' bene' ca' zjanaque' Jesúsen' txen bosoxonje' gosebejyichje'ne'.

### Bi' güego' bin' boxonj

<sup>51</sup> Na' to bi' güego' na'obe' Jesúsen', na' nɔoa cože'be' toze sávana. Na' bene' ca' ba gosezene' Jesúsen' lecze gosenize'be'. <sup>52</sup> Perw gwlejyichjbe' sávanan' na' boxonjbe' ga'alyidbe'.

### Goseche'e Jesúsen' lao bene' ca' chesenabia' nación Israelen'

(Mt.26:57-68; Lc. 22:54-55, 63-71; Jn. 18:12-14, 19-24)

<sup>53</sup> Nach goseche'e Jesúsen' lao bɔoz blaon', na' besežag yogo' bene' ca' zjanac bɔoz gwnabia', na' bene' gole blao ca' chesenabi'e nación cheton' na' bene' ca' bososed bosolo'ede' dan' bzoj da' Moisés. <sup>54</sup> Na' Pedron' na'ogüe' Jesúsen' zito' zito'le bžintie' liž bɔoz blaon' na' gwyo'e chyo'ona' gwchi'e txen len bene' ca' chesape' yodao' blaon' boše'e cuine' cho'a yi'.

<sup>55</sup> Na' ca' nac bɔoz blaon' na' yogo' bene' ca' chesenabia' nación cheton', besyeyiljwlaže' bi da' yesagüe' xya che Jesúsen' cont yesote'ne', perw bi besyeželden'. <sup>56</sup> Na' zan bene' gosone' diža' güenlaže' che Jesúsen', perw bi gosene' toz ca' yesene'. <sup>57</sup> Bałe' gosezože'e na' bososbague'ne' xya chol' gosene':

<sup>58</sup> —Neto' beneto' gwne': "Neda' yochinja' yodao' nga da' ben benach, na' šone žaze yeyona' yeto yodao' da' bi gon benach."

<sup>59</sup> Perw ne' ca' ca' gosene' toz ca' yesene'.

<sup>60</sup> Nach bɔoz blaon' gwzože'e ladjo yogo'lóle' na' gwɔnabde' Jesúsen': —¿Bi choži'o xtižen'? ¿Bi dan' chosožie' le' xya?

<sup>61</sup> Perw Jesúsen' bitw bi gwne', bitw boži'e xtižen'. Na' bɔoz blaon' da' yoble gwɔnabde' le', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonxenko?

<sup>62</sup> Jesúsen' gože'ne':

—Le can' naca'. Na' le'ele neda' cate' ba chi'a šla'a licha che Dios ben' nac la'zelagüe' bene' gwnabia', neda' naca' ben' gwsele' golja' benach. Na' le'ele yetja' ladjo bejw dan' ze le'e yaban'.

<sup>63</sup> Nach bɔoz blaon' gwcheza' xalane' cont nacbia' bi beque'e can' gwna Jesúsen', na' gwne':



—Noch no chyažje bene' co' da' bali. <sup>64</sup> Le'e ba benele chne' che Dios dan' že' ca', chon cuine' ca Dios. ¿Nacxe ža le'e?

Na' yogüe' gosene' nape' dola' na' cheyala' gate'.

<sup>65</sup> Nach bale' gosezolagüe' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' che' gose'ene':

—iGwnaşc non' chot le'!

Na' bene' ca' chesape' yodao' blaon' gosot goseyine' le'.

### Pedron' bi gwchebe' še nombi'e Jesúsen'

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Pedron' chi'e chyo'o che'ejele, cate' bžin to no'ole güen žin che bꝁoz blaon'. <sup>67</sup> Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

<sup>68</sup> Perw Pedron' bi gwchebe', gwne':

—Bi nombi'ane', neca nezda' bin' žo'.

Na' beyej Pedron' jayzie' cho'a puert na'le. Nach gwchež to jea. <sup>69</sup> Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' txen.

<sup>70</sup> Perw le' da' yoble bi gwchebe' še naque' txen len Jesúsen'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nacia' chnio' can' chesene bene' Galilea ca'.

<sup>71</sup> Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

<sup>72</sup> Na' cate' la' gwchežte jean' da' gwchope. Nach jayze'e Pedron' can' gož Jesúsen' le': “Biña' cuež jean' chop ni'a cate' gac šon ni'a bi chebo' še nombi'o neda'.” Na' cate' jayze'ede' can' gož Jesúsen' le', na' gwcheže'.

### Goseche'e Jesúsen' lao Pilato

(Mt. 27:1-2, 11-14; Lc. 23:1-5; Jn. 18:28-38)

**15** <sup>1</sup> Ca gwyeni', bꝁoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesúsen' na' goseche'ene' jasesane'ne' lo na' Pilato ben' nac gobernador. <sup>2</sup> Pilaton' gwñabde'ne', gože'ne':

—¿Len' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

<sup>3</sup> Na' bꝁoz gwnabia' ca' da' zan da' bosocuiše'ne'. <sup>4</sup> Nach Pilaton' da' yoble gwñabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

<sup>5</sup> Perw Jesúsen' bitw bi gwne'. Na' Pilaton' bebande' che'.

### Gosechogbi'en gat Jesúsen'

(Mt. 27:15-31; Lc. 23:13-25; Jn. 18:38 - 19:16)

<sup>6</sup> Na' gota' costumbr, Pilaton' gwsane' to bene' de ližya caten' chala' lni pascw che neto' bene' Israel, con to bene' yesenab bene' gualaž cheton'.

<sup>7</sup> To bene' lie' Barrabás na' len yexonj bene' gosot bene' cate' besyedabague' gobiernna' zjayo'e lo' ližya len nochle bene' güen da' mal.

<sup>8</sup> Nach besežag bene' na' gosenabde' Pilaton' gwsane' to bene' con can' nac costumbr chegaquen'. <sup>9</sup> Na' Pilaton' boži'e xtiža'gaquen' gwne':

—¿Chaclaže'le gwsana' rey che le'e nacle bene' Israel?

<sup>10</sup> Gwne' ca' le' gocbe'ede' dan' chesacxi'a bχoz gwnabi'a ca' Jesúsen', da'nán' bosodie' le' lo' ne'e. <sup>11</sup> Perw bχoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. <sup>12</sup> Nach Pilaton' gwnabde' legaque':

—¿Bixe gona' len ben' žale nac rey che le'e nacle bene' Israel?

<sup>13</sup> Legaque' bososya'adie' bosyoži'e xtižen':

—iBde'e le'e yag cruz!

<sup>14</sup> Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—iBde'e le'e yag cruz!

<sup>15</sup> Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw che' ca' Jesúsen', nach bene' le' lo' na'gaque' cont yosode'ene' le'e yag cruz.

<sup>16</sup> Nach soldadw ca' goseche'ene' yeto latje dan' zoa chyo'o che liž bene' gwnabian', na' bosotobe' yogo' soldadw ca', zjanac zane'.

<sup>17</sup> Gosechize' Jesúsen' to lache' moradw, na' gosone' to corona de xis yeše' bosozoen' yichjen'. <sup>18</sup> Na' gosezolagüe' chesonle' che', chesosye'e:

—iViva, rey che bene' Israel!

<sup>19</sup> Na' bosozete' yichjen' xis, bosožičene' xene', na' bosozoa xibe' gosone' ca' bene' chesonxen le'. <sup>20</sup> Beyož gosonle' che', besyeyine' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

### Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

<sup>21</sup> Na' šlac zjanche'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yixe', na' bosogüe'ene' yag cruz che Jesúsen'.

<sup>22</sup> Goseche'e Jesúsen' latje ga nzi' Gólgota, zeje dižan' Latje che Žit Yichj Bene' Guat. <sup>23</sup> Na' goso'ene' vino da' nchixe to nechw da' nzi' mirra, perw Jesúsen' bi goclaže' ye'ejen'. <sup>24</sup> Nach bosode'ene' le'e yag cruzen'.

Na' soldadw ca' gosone' rifa cate' besyele'e xalana' Jesúsén' cont bla' bi besyecheł to toe'.

<sup>25</sup> Cheda ga šezille caten' bosode'ene' le'e yag cruz. <sup>26</sup> Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: “Rey che Bene' Israel.” <sup>27</sup> Txen len Jesúsén' lecze bosode' le'e yag cruz yechope bene' gwban, toe' šla'a licha, na' yetoe' šla'a robes. <sup>28</sup> Na' da' gosone' ca', goc ca' nyoj Xtiža' Diosen', žan: “Gosone'ne' ca' bene' güen da' xinj.”

<sup>29</sup> Na' bene' gosede gala'ze gosezi'diže'ne', con chosota yichje' gosene': —Le' gwnao' yochinjo' yodaon' na' šone žaze yeyontion'. <sup>30</sup> Bosla cuino' na' beyetj le'e yag cruza'.

<sup>31</sup> Lecze ca' bxoz gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'. <sup>32</sup> Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

### Can' goc caten' got Jesúsén'

(Mt. 27:45-56; Lc. 23:44-49; Jn. 19:28-30)

<sup>33</sup> Cate' bžin guagwbiž, doxen yežlion' goc chol, bžinte cheda šone.

<sup>34</sup> Na' ca' hora' Jesúsén' gwne' zižje gwne':

—Eloi, Eloi člama sabactani? —zeje diža': Dios chia', Dios chia', čbixchen' ba gwlejiychjo' neda'?

<sup>35</sup> Na' bal bene' ca' zjanita' na' gosende' na' gosene':

—Le gwzenag, chol güiže' da' Elías, ben' be' xtiža' Dios cani'.

<sup>36</sup> Nach to bene' ca' gwyejsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsén' cont xopen', na' gwne':

—Cuezcho, yešque güid Elíasen' yeletje' le'.

<sup>37</sup> Nach Jesúsén' bosye'e zižje, na' gote'. <sup>38</sup> Na' lache' da' ze lo' yodao' blaon' bcheza' gacholen, gwza'te yichjen bžinte che'ełe. <sup>39</sup> Na' xan soldadw ca' zie' lao Jesúsén', na' cate' bende' can' bosye'en na' ble'ede' can' goten', gwne':

—Da' li le bengan' goc dogualje Xi'in Dios.

<sup>40</sup> Lecze bal no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José. <sup>41</sup> No'ol qui gosa'ogüe' Jesúsén' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

**Bosocuaše' Jesúsen'**

(Mt. 27:57-61; Lc. 23:50-56; Jn. 19:38-42)

<sup>42</sup> Žana' goquen žan' bososini'e par ža che Dios cate' bi de lsens yesone' žin. Na' cate' ba chxoa gwbiž, <sup>43</sup> to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosenabi'e nación Israel cheton', na' ba zoe' chbeze' batcan' solao nabia' ben' seła' Diosen'. <sup>44</sup> Pilaton' bebande' dan' ba gote', na' goxe' xan soldadw ca' cont gwnabde' le' še da' li ba gote'. <sup>45</sup> Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'. <sup>46</sup> Nach Josén' gwzi'e to lache' xen, beletje' cuerp che Jesúsen' na' bolažen' len. Na' la' jaseło'ote' le' to lo' bloj da' nche'ene' le'e yej xen, na' blole' to yej cho'a blojen' cont bseyjon len. <sup>47</sup> Na' María no'ole Magdalan' len María xna' Josén' besele'ede' gan' bosocuaše'nen'.

**Beban Jesúsen' ladjo bene' guat ca'**

(Mt. 28:1-10; Lc. 24:1-12; Jn. 20:1-10)

**16** <sup>1</sup> Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che Jesúsen'. <sup>2</sup> Na' šezildao' ža dmigw besežine' cho'a ban', cate' za' chla' gwbiž. <sup>3</sup> Na' za' yesežine' gose' lježe':

—¿Noxe ca'a yej xen dan' da' cho'a blojen'?

<sup>4</sup> Perw cate' besežine' na' gosene'e, besele'ede' yej xen dan' da' cho'a blojen' ba bga'an. <sup>5</sup> Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' ton da' šiš. Na' besežebe'. <sup>6</sup> Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'. <sup>7</sup> Le šjaya'ac na' le ye' bene' ca' gosaque' le' txen, na' len Pedron', gwyobech Jesúsen' yežine' Galilea clel ca' legaque'. Na' Galilean' na' yesele'ede'ne' can' gwnacze'.

<sup>8</sup> Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

**Jesúsen' blo'elagüe' María no'ole Magdala**

(Jn. 20:11-18)

<sup>9</sup> Beyož beban Jesúsen' ladjo bene' guat ca' šezildao' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. <sup>10</sup> Na' María nga jatixjue'ede' bene' ca' ba gosenita' len le'. Zjanita'yaše' na' chesebeže' cate' bžine'. <sup>11</sup> Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

**Jesúsen' blo'elagüe' len chop bene' ca' gosaque' le' txen**

(Lc. 24:13-35)

<sup>12</sup> Beyož goc ca', chop bene' ca' gosaque' Jesúsen' txen zjangüe'e nez yix'e cate' Jesúsen' blo'elagüe' legaque', na' nža'le besele'ede'ne'. <sup>13</sup> Lecze legaque' ja'aque' jasedixjue'ede' bene' yezica'chle, perw neca gosejle'e chegaque'.

**Da' bgon Jesúsen' yeson bene' ca' chsejnilaže'ne'**

(Mt. 28:16-20; Lc. 24:36-49; Jn. 20:19-23)

<sup>14</sup> Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gw dile' legaque' da' bi chesejnilaže' le' do yichj do laže' na' zjanaque' laždao' chach, le bi gosejle'e che bene' ca' besele'ede'ne' ba bebane' ladjo bene' guat ca'. <sup>15</sup> Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol bene'. <sup>16</sup> Bene' ca' yesejnilaže' neda' na' yesezoe' nis, gata' yela' mban chegaque' toli tocane. Perw bene' bi chesejnilaže' neda', yesebiaye'e.

<sup>17</sup> Na' bene' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz bene'; yeseñie' diža' cobe da' bi zjansede';

<sup>18</sup> na' še yesože' no bel znia, o še yese'eje' da' nac venen, bibi yesacde'; na' lecze yesexoa taque' yichj bene' chese'e na' yesyeyacde'.

**Begüe Jesúsen' yaba**

(Lc. 24:50-53)

<sup>19</sup> Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a licha. <sup>20</sup> Na' bene' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesúsen' goclene' legaque' gosone' yela' guac cont gosejle' bene' le' nac da' li dižan' goso'en. Da' na'zen' chzoja'.